

Mac **Chĩc Atõng Parnai O Tẽ Yê-su** **Crĩt** **Santoiq Atõng**

Mac bữn ramứh Yang Mac hỡ. Ắn chĩc saráq nài sám 50 toađ 60 cumo ntun Yê-su canõt. Mac atõng tẽ Yê-su la manoađ ca bữn chớc lứq. Chớc tẽ Yê-su hái tẽq hữm bo ắn atõng parnai Yiang Sursĩ. Ắn bữn chớc rơi tuih aloõh máh yiang sũaq, cớp ắn bữn chớc tẽq táh lỏih yỏn máh cũai. Yê-su la Con Yiang Cõt Cũai. Ắn chiau dỏi tamoođ ắn đởq thỏi nheq tữh cũai tẽ ốc lỏih, yỏn máh cũai tẽq bữn tamoođ.

Mac atõng tẽ máh ranáq Yê-su táq, hỏn tẽ máh ốc Yê-su atõng. Dâu lứq, Mac chĩc tẽ Yang ca táq batẽm, tẽ Yê-su roap batẽm, cớp yiang Satan chim Yê-su. Mac atõng tẽ máh ốc Yê-su chũuq túh coat, cớp noau tẻh ắn tắng aluang sangcắng; vớ t ki ắn tamoođ loah tẽ cuchĩt.

Yang Ca Táq Batẽm

(Mathia 3:1-12; Luca 3:1-18; Yang 1:19-28)

¹ Santoiq nài tabỏq atõng parnai o tẽ Yê-su Crĩt, Con Yiang Sursĩ.

² Ê-sai la cũai tang bỏq Yiang Sursĩ, khoiđ chĩc atõng saccoiđ tẽ Yang neq:

“Cứq Yiang Sursĩ ớn cũai ranẽng cứq toâq
nhũang mới,
dõq thrũan rana yõn mới.”✧

³ Sương án sabau atõng casang tẽ ntõq aiq neq:
“Cóq anhia atức rana yõn Ncháu hái.

Cháh báng yõn tanoang rana dõq án pỡq.”✧

⁴ Ngkíq Yang lứq toâq. Án ớt tâng ntõq aiq, cớp
án táq batẽm yõn máh cũai. Án pỡq pau atõng
yõn nheq tữh cũai dáng tẽ ranáq batẽm. Batẽm
la táq tếc cũai khoiq ngin lôih lêq cõt mút tamái
ẽn, dõq Yiang Sursĩ táh lôih yõn alóí. ⁵ Ngkíq
nheq tữh cũai tâng cruang Yudê cớp nheq tữh
cũai tâng vil Yaru-salem toâq pỡ án. Alóí ngin
lôih, chơ Yang táq batẽm yõn alóí tâng crõng
Yôr-dan.

⁶ Yang dõq tâc tampác noau táq toâq sóc
charán lac-da. Án cantoân parnoân ngcâr tâng
ngkĩng. Án cha lam cớp nguaiq dõq khĩal tẽ
aruih. ⁷ Parnai án atõng la neq: “Ntun cứq bữn
manoaq ẽn toâq. Án ki sớt clũí tẽ cứq. Cứq la
tữ bữn dũ chóc dẽh leh cansái cớp tẽ ayũng án,
yuaq cứq bữn chóc cacót lứq. ⁸ Cứq táq batẽm
yõn anhia na dõq sâng, ma án táq batẽm yõn
anhia na Raviei Yiang Sursĩ.”

Yang Táq Batẽm Yõn Yê-su

(Mathia 3:13-4:11; Luca 3:21-22; 4:1-13)

⁹ Bữn muoi tangái Yê-su toâq tẽ vil Na-sarết,
cruang Cali-lê. Chơ Yang táq batẽm yõn Yê-su
ớt tâng crõng Yôr-dan. ¹⁰ Tữ Yê-su chõn tẽ dõq,

án hữm paloõng samoât riang noau pớh, cớp án hữm Raviei Yiang Sursĩ sễng tễ paloõng ariang chớm tariap, chớ póc tâng tổ án. ¹¹ Muoi pớh ki, bữn sớng Yiang Sursĩ sabau atõng tễ paloõng neq: “Mớ la Con ca cứq ayooq lứq. Ntrớu mớ táq, la cứq bữi neq.”

¹² Bo ki tôp Raviei Yiang Sursĩ dững Yê-su pớq chu ntốq aiq. ¹³ Yê-su ốt tâng ntốq aiq ki neq pỗn chít sadâu pỗn chít tangái. Chớ yiang Satan chim án, yoc ễ radững án táq lôih.* Yê-su ốt bân ntốq charán arũih, cớp ranễng Yiang Sursĩ tễ paloõng toâq chuai án.

Yê-su Mbõiq Táq Ranáq Án Tâng Cruang Cali-lê
(*Mathia 4:12-17; Luca 4:14-15*)

¹⁴ Vớt noau khoiq chớq Yang tâng cuaq, Yê-su mut tâng cruang Cali-lê cớp atõng parnai o tễ Yiang Sursĩ. ¹⁵ Án atõng neq: “Khoiq toâq ngư chớ. Cheq chớ Yiang Sursĩ táq sớt. Ngkíq cóq anhia ngin lôih lêq cõt mứt tamái ễn cớp sa-âm parnai o tễ Yiang Sursĩ.”

Yê-su Ớn Pỗn Náq Ca Chuaq Sĩaq Puai Án
(*Mathia 4:18-22; Luca 5:1-11*)

¹⁶ Bo Yê-su pớq tâng tor clóng Cali-lê, án hữm bar náq sễm ai ramứh Si-môn cớp Anrê. Alới yoang alieiq tâng clóng ki, yuaq alới la cũai táq ranáq chuaq sĩaq. ¹⁷ Yê-su atõng alới neq:

* **1:13** 1:13 Yiang Satan sớt neq yiang sâuq canớh.

“Anhia puai cúq; chơ cúq táq yõn anhia cõt cũai chuaq cũai samoât anhia chuaq sĩaq nãi tê.”

¹⁸ Bo ki toâp alóí táh alieiq, chơ alóí puai Yê-su.

¹⁹ Yê-su pởq bĩq ẽn; chơ án hũm bar náq sễm ai canõh ẽn ramứh Yacõ cớp Yang, con samiang Sê-badê. Alóí õt clam loah alieiq tâng tuoc. ²⁰ Bo ki toâp Yê-su sabau alóí. Ngkíq alóí yõn mpoaq alóí, Sê-badê õt tâng tuoc cớp cũai tuthẽ. Chơ alóí bar náq ki puai Yê-su.

Cũai Bữn Yiang Sâuq (Luca 4:31-37)

²¹ Vót ki, Yê-su cớp cũai rien tê án mut tâng vil Cabê-na-um. Toâq Tangái Rlu Yê-su mut tâng đống sang tốp I-sarel cớp atõng ngki. ²² Mách cũai ngki sâng dót lứq tê parnai án atõng. Án atõng ariang cũai bữn chóc lứq, tở bữn ariang cũai yõng rit đốq atõng. ²³ Tâng đống sang, bo ki bữn manoaq cũai bữn yiang sâuq payõh. Án hẽ casang lứq neq: ²⁴ “Ntróu anhia yoc cớp hẽq, Yê-su tê vil Na-sarết? Anhia toâq pở nãi ẽ cachĩt hẽq tở? Cúq saccoal anhia; anhia toâq tê Yiang Sursĩ cớp anhia la bráh o lứq.”

²⁵ Yê-su sươq yiang sâuq ki: “Chõĩ tabõq! Mớĩ loõh chíq tê tở cũai nãi!”

²⁶ Moâm ki yiang sâuq carvút tưng-tooc cũai ki, chơ án loõh. Bo yiang sâuq loõh, án hẽ casang lứq. ²⁷ Aléq aki sâng dót lứq. Manoaq blớh manoaq neq: “Nớq têq án táq ranáq nãi? Án atõng parnai tamái cớp bữn chóc salẽh. Án sươq yiang sâuq, cớp yiang ki trĩh án.”

28 Chơ máh ranáq Yê-su táq cõt parhan cháil lứq tâng dũ vil mpễr cruang Cali-lê.

Yê-su Táq Bán Cứng Cũai A-ĩ
(*Mathia 8:14-17; Luca 4:38-41*)

29 Vớt Yê-su loõh tễ dõng sang, án pỡq parnơi cốp Yacõ cốp Yang, chơ mut tâng dõng Si-môn cốp Anrê. 30 Yacán Si-môn bẻq tua cõ án a-ĩ cutâu tỗ; chơ alóit atõng yõn Yê-su dáng ayoaq nài a-ĩ. 31 Yê-su toâq pỡ ayoaq ki cốp tếc ayuor án. Tữ án yuor, án cõt bán, cốp tẻq loah aloõh sana yõn tamoi cha.

32 Toâq tabũ, mandang pát chơ, noau dững máh cũai a-ĩ cốp cũai bữn yiang sâuq táq. 33 Nheq tữh cũai tâng vil ki rôm yáng tiah cheq ngoah toong. 34 Yê-su táq bán cứng cũai bữn sa-ữi ramứh a-ĩ. Cốp án tuih aloõh yiang sâuq tễ tỗ cũai hỡ. Án tỡ yõn yiang sâuq táq ntõng ntrớu, yuaq yiang sâuq saccoal án.

Yê-su Pỡq Atõng Tâng Cruang Cali-lê
(*Luca 4:42-44*)

35 Toâq tarup Yê-su tamỡ tễ cláih lứq, paloõng tỡ yũah poang. Án loõh tễ vil, chơ án pỡq chu ntóq tỡ bữn noau õt, yoc ẽ câu ngki. 36 Si-môn cốp yóu án pỡq chuaq Yê-su. 37 Toâq alóit tamóh án, alóit atõng án neq: “Nheq tữh cũai chuaq ẽ ramóh thài.”

38 Yê-su ta-õi alóit neq: “Hái cóq pỡq chu vil canõh ẽn, pỡq chu máh vil mpễr nài. Cứq yoc atõng tâng vil ki hỡ. Mpoaq cứq ớn cứq toâq pỡ nài dỏq táq ranáq nài.”

³⁹ Ngkíq Yê-su pǝq atǝng tâng máh đǝng sang tǝp I-sarel tâng cruang Cali-lê. Án tuih aloǝh yiang sâuq tǝ tǝ cũai hǝ.

*Yê-su Táq Bán Cũai A-ĩ Tut
(Mathia 8:1-4; Luca 5:12-16)*

⁴⁰ Bǝn manoaq cũai a-ĩ tut toâq pǝ Yê-su. Án sacǝh racǝl cǝp cucǝh cucũoi pai neq: “Khân Ncháu yoc, tǝq Ncháu táq yǝn cứq cǝt bán.”

⁴¹ Yê-su sâng sarũiq táq, chǝ án aloǝh atĩ satoaq cũai ki. Cǝp án pai neq: “Cứq yoc. Yǝn mới cǝt bán.”

⁴² Bo ki toâp cũai ki cǝt bán a-ĩ tut. Tǝ án cǝt o loah. ⁴³ Yê-su ǝn án chu toâp, cǝp án patâp cũai ki neq: ⁴⁴ “Chǝi atǝng yǝn cũai canǝh dáng tǝ ranáq nâi. Ma cóq mới pǝq apáh tǝ mới yǝn cũai tǝng rit sang Yiang Sursĩ nhêng. Chǝ mới chiau sang yǝn Yiang Sursĩ máh ramứh Mǝi-se khoiq patâp tǝ mbǝq. Nâi la tǝc apáh yǝn cũai canǝh dáng mới khoiq cǝt bán chǝ.”

⁴⁵ Ma tǝ cũai ki loǝh tǝ Yê-su, án pǝq atǝng tǝ ranáq Yê-su chuai án. Chǝ santoiq nâi trởh la-ũt la-ũi. Yuaq ngkíq, khân Yê-su yoc ẽ mut tâng vil, cóq án mut clǝp, tǝ yǝn noau hǝm án. Án ǝt yáng tiah vil bân ntǝq tǝ bǝn noau ǝt. Ma noâng bǝn cũai tǝ dũ ntǝq toâq pǝ án.

2

*Yê-su Táq Bán Cũai A-ĩ Coang
(Mathia 9:1-8; Luca 5:17-26)*

1 Vót bar pái tangái ẽn, Yê-su chu loah pở vil Cabê-na-um. Khoiq noau sâng han án chu toâq pở dống. 2 Cũai pởq rôm pở ki chững lứq. Tâng ngoah toong tở bữn ntốq mut noâng, nheq tadát chơ. Ngkíq Yê-su atỡng parnai Yiang Sursĩ yỗn alóí sâng. 3 Bữn noau dững asuoi manoaq a-ĩ coang nheq tở toâq pở án. Pỗn náq samiang crang cũai a-ĩ ki. 4 Ma tữ alóí hữm chững lứq cũai ốt khĩt Yê-su chơ, alóí tở dáng na léq ẽ mut pở Yê-su. Ngkíq alóí pớh mpuol dống choâng Yê-su ốt, cở ẽ atĩar asẽng cantrang ca bữn samiang a-ĩ ki. 5 Tữ Yê-su dáng mút alóí sa-âm lứq, ngkíq án atỡng cũai a-ĩ coang ki neq: “Yóu ơi! Lôih mới cứq táh yỗn.”

6 Bữn máh cũai yống rit tacu ngki tê. Alóí chanchóm tâng mút alóí neq: 7 “Nốq cũai nâi pai ngkíq? Án yoc ẽ táq chóc máh Yiang Sursĩ tê. Ngkíq santoiq án pai la máh án acrieiq Yiang Sursĩ chơ. Tở bữn cũai aléq têq táh lôih. Ống Yiang Sursĩ toâp têq táh lôih.”

8 Bo ki toâp Yê-su dáng alóí ki chanchóm ngkíq tâng mút alóí. Án blớh alóí neq: “Nốq anhia chanchóm ngkíq? 9 Santoiq aléq anhia sâng ien hỡn yỗn cứq atỡng? Ien cứq atỡng cũai a-ĩ coang neq: ‘Lôih mới cứq táh yỗn,’ tở la ‘Mới yuor tayứng cớp pởq. Mới dững achu loâng cantrang mới?’ 10 Ma sanua cứq ẽ táq yỗn cũai a-ĩ nâi cõt bán đốq yỗn anhia dáng samoât samơi, cứq Con Yiang Cốt Cũai bữn chóc tâng đõi nâi. Cứq têq táh lôih cũai.”

Moâm ki Yê-su atỡng yỗn cũai a-ĩ coang neq:

11 “Cứq ớn mới yuor tayúng. Mới ít dõl cantrang mới. Chơ mới chu loah pở dõng mới.”

12 Ngkíq cũai ki yuor tayúng. Án ít toáp cantrang án, loõh chíq tễ cũai cứng ki. Tữ alóí hữm ngkíq, aléq aki sâng dớt lứq cớp alóí khễn Yiang Sursĩ. Alóí pai neq: “Hái tở nai hữm ranáq nneq.”

*Yê-su Ớn Lê-vi Puai Án
(Mathia 9:9-13; Luca 5:27-32)*

13 Vót ki Yê-su pởq loah sĩa pở tor clóng. Cứng lứq cũai rôm loah pễn án; chơ án atõng alóí ki.

14 Bo án pởq, án hữm Lê-vi,* con samiang Alphê, ớt tacu táq ranáq tâng dõng noau parõm ít práq thễq. Yê-su ớn Lê-vi neq: “Mới puai cứq.”

Ngkíq Lê-vi yuor tayúng puai án.

15 Moâm ki Yê-su pởq cha dõl tâng dõng Lê-vi. Ớt ngki bữn cứng cũai parõm ít práq thễq, cớp cũai lôih canõh hữ cha parnõi nững Yê-su cớp tốp rien tễ án. Yuaq bữn cứng cũai ki puai án.

16 Bữn cũai yống rit tễ tốp Pha-rasi hữm Yê-su cha parnõi cớp cũai parõm ít práq thễq cớp cũai lôih canõh. Ngkíq cũai yống rit ki blóh tốp rien tễ Yê-su: “Nỏq án ki cha parnõi cớp cũai parõm ít práq thễq cớp máh cũai lôih?”

17 Yê-su sâng alóí ki pai ngkíq; chơ án atõng alóí neq: “Cũai bán o tở bữn sễq yõn noau palai. Ma óng cũai a-ĩ sâng cóq sễq yõn noau palai. Cứq tở bữn toáq pở nãi dõq arô cũai ca ngin alóí

* **2:14** 2:14 Lê-vi noau dõq ramứh Ma-thia hữ.

tanoang o, ma cứq toađ pở nâi đởq arô cũai ca đảng alới bữn lờih.”

Yê-su Aởng Tể Ót Sana
(*Mathia 9:14-17; Luca 5:33-39*)

¹⁸ Mảh cũai rien tể Yang cớp mảh cũai Phara-si, alới đởq rườh tangái đởq ót sana cở alới yoc chanchỏm tể ngê Yiang Sursĩ. Alới toađ blớh Yê-su neq: “Tỏp rien tể Yang cớp cũai ca puai tỏp Phara-si, alới rườh tangái đởq ót sana. Nỏq tỏp rien tể thâi tở bữn táq machớng alới ki tê?”

¹⁹ Yê-su ta-ỡi loah alới neq: “Khân bữn sami-ang ít lacuoi, bo yớu pởq racoaiq cớp án, alới sảng bũi. ²⁰ Ma tữ alới chu tể racoaiq, alới miar ỏt. Tữ ki alới ót sana đởq sanhữ loah yớu alới.†

²¹ “Tở bữn noau tamoal aroaiq tamái tảng tampỏc khiq anhỏh. Khân noau táq ngkíq, ramoal ki carỏn cớp ra-ỏc aroaiq anhỏh. Ngkíq raháq ki cởt la-a lứq ẻn. ²² Cớp tở bữn noau chiaq blớng tamái tảng aluoi ngcỏr khiq tiaq chớ. Khân noau táq ngkíq, blớng ki cởt puaiq, cớp acỏn pa-át ki táq yỏn aluoi ngcỏr padỏh. Chớ aluoi ngcỏr cớp blớng ki pứt neq. Ma blớng tamái cớq chỏq tảng aluoi ngcỏr tamái.”‡

† **2:20** 2:20 Tảng parnai nâi, Yê-su sacỏm án la samoỏt án ít lacuoi. Bo Yê-su noảng ỏt cớp tỏp rien tể án, alới noảng chỉ-cha. Ma tữ án chỏn chu paloỏng, alới ót sana tê cở alới yoc chanchỏm loah mảh santoiq án khiq aởng alới. ‡ **2:22** 2:22 Yê-su aởng tể aroaiq cớp blớng, la án sacỏm cũai bữn mút pahỏm tiaq, tở tẻq ít parnai tamái ca Yê-su aởng alới. Ởng alới ca bữn mút tamái sảng tẻq ít parnai ki.

*Yê-su Atông Tễ Rit Tangái Rlu
(Mathia 12:1-8; Luca 6:1-5)*

²³ Bữn muoi Tangái Rlu, Yê-su cốp tộp rien tễ án mut tâng sarái noau chớh saró bali. Ntơn alóí pỏq, ntơn alóí rút cha saró bali ki. ²⁴ Tộp Pha-rasi atông Yê-su neq: “Ki! Nỏq tộp rien tễ thâi táq ranáq tở cớt rit cuang ntróu tâng Tangái Rlu.”

²⁵ Yê-su ta-ỡi alóí neq: “Nỏq riang pai anhia tở nai doc tâng tâm saráq Yiang Sursĩ tễ puo Davĩt khoiq táq ntróu? Davĩt cốp tộp puai án, alóí ỏq crong sana cốp alóí sâng panhieih lứq. ²⁶ Ngkíq Davĩt mut tâng đống sang Yiang Sursĩ. Án cha cốp yỗn yóu án cha tê bẻng đỏq yáng moat Yiang Sursĩ. Bẻng nâi ống cũai tẻng rit sang Yiang Sursĩ sâng tẻq cha. Bo ki Abia-tha la sớt neq tễ rit sang Yiang Sursĩ.”

²⁷ Yê-su atông loah alóí neq: “Yiang Sursĩ tở bữn tẻng cũai đỏq chuai Tangái Rlu, ma án tẻng Tangái Rlu đỏq chuai cũai. ²⁸ Cứq, Con Yiang Cớt Cũai, la Ncháu tê Tangái Rlu.”

3

*Manoaq A-ĩ Yỗt Atĩ
(Mathia 12:9-14; Luca 6:6-11)*

¹ Bữn muoi tangái Yê-su mut tâng đống sang tộp I-sarel, cốp bữn manoaq samiang yỗt atĩ tâng đống sang ki. ² Cốp bữn cũai canỏh ỏt ngki nhêng chu Yê-su, yoc ẻ dáng án táq bán cũai a-ĩ ki tâng Tangái Rlu, ma tở bữn. Alóí chi-chuaq ỏc lôih yoc ẻ cauq Yê-su. ³ Yê-su atông cũai yỗt atĩ

ki neq: “Mới yuor tayúng yáng moat máh cūai nài.”

⁴ Chơ Yê-su blóh alóí ca ốt mpễ ki neq: “Khân puai rit hái, ntróu anhia sâng p̄ieiq hõn noau táq tâng Tangái Rlu? P̄ieiq noau táq o, ma p̄ieiq noau táq sâuq? P̄ieiq noau chuai amoong, ma p̄ieiq noau cachĩt? Ốc aléq anhia sâng o hõn?”

Ma alóí ki tở bữn ta-õi ntróu.

⁵ Yê-su carlang nhêng chu alóí ki. Án sâng ũan lứq alóí bữn mút coang. Chơ án ớn cūai a-ĩ ki neq: “Mới aloõh atĩ.”

Tữ án aloõh atĩ án, chơ atĩ án cõt bán. ⁶ Ngkíq tộp Pha-rasi loõh tễ đống sang ki p̄õq toáp ramóh tộp puai Hê-rôt. Nheq alóí ki sarhống ễ cachĩt chíq Yê-su.

Clúng Cūai Ốt Cheq Tor Dỡq Clóng

⁷ Vót ki Yê-su cốp tộp rien tễ án loõh tễ ki, chơ pở chu dỡq clóng. Tộp cūai clúng lứq tễ cruang Cali-lê toâq pở án. ⁸ Toâq noau sâng han tễ ranáq án táq, sa-ũĩ cūai toâq pở án tễ cruang Yudê, tễ vil Yaru-salem, tễ cruang I-dumê, tễ cruang yớng tễ crống Yê-dan, cốp tễ cruang mpễ vil Ti-rơ cốp vil Sadôn hõ. ⁹ Chơ Yê-su ớn tộp rien tễ án p̄õq mian dỡq muoi lám tuoc, yuaq án tở ẽq cūai clúng ki nêt tở án. ¹⁰ Clúng cūai a-ĩ toâq nêt yoc ễ satoaq tở án, cõ án khoiqt táq yõn bán sa-ũĩ cūai a-ĩ chơ. ¹¹ Ma tữ yiang sâuq hữm Yê-su, alóí padêh muoi tatúp yáng moat án. Alóí ki pai casang lứq neq: “Anhia lứq Con Yiang Sursĩ.”

¹² Ma Yê-su sỡoq yiang sâuq ki chõĩ atõng yõn cūai canõh dáng án la noau.

*Yê-su Rươh Muoi Chít La Bar Náq Rien Tễ Án
(Mathia 10:1-4; Luca 6:12-16)*

¹³ Yê-su chôn tâng cóh, cóp án arô yỗn toâq pỡ án máh cũai án khoi q rươh. Ngkíq alóí toâq pỡ án. ¹⁴ Yê-su rươh muoi chít la bar náq ca đốq ốt cóp án. Án đốq alóí la: tốp ayững aĩ án, cóp án patâp alóí la chu léq alóí pỡq, kị cóq alóí atống pỡ ki. ¹⁵ Án yỗn alóí bữn chóc tuih aloỏh yiang sâuq hỡ. ¹⁶ Máh ramứh tốp muoi chít la bar náq án rươh la neq: Si-môn, án ca Yê-su amứh Phi-er; ¹⁷ Yacỡ cóp a-ễm án ramứh Yang, alóí bar náq la con samiang Sê-badê. Yê-su đốq loah ramứh alóí Bô-anet ễn. Santoiq Bô-anet parlong loah la ‘sanốq crứm’. ¹⁸ Bữn đếh Anrê, Phi-lip, Batê-lami, Mathia, Thô-mat, Yacỡ con samiang Al-phê, Thadê, Si-môn Sê-lôt, ¹⁹ cóp Yuda I-cari-ôt, án ca chốq yỗn noau cachĩt Yê-su.

*Yê-su Cóp Bên-sabul
(Mathia 12:22-32; Luca 11:14-23; 12:10)*

²⁰ Vót ki Yê-su mut tâng muoi đống. Chơ cứng lứq cũai pỡq rôm loah pỡ ki. Yê-su cóp tốp rien tễ án tỡ tềq đếh chi-cha yuaq tadát nheq cũai. ²¹ Tữ mpiq cóp a-ễm Yê-su khoi q sâng tễ ranáq nâi, alóí toâq yoc ễ đững aloỏh chíq Yê-su tễ cũai cứng, yuaq alóí sâng noau pai neq: “Án la samoât cũai yủh.”

²² Bữn cũai yống rit sễng tễ vil Yaru-saleh. Alóí pai neq: “Yê-su tềq tuih aloỏh yiang sâuq cỗ yiang Bên-sabul ốt cóp án cóp yỗn án bữn

chóc táq ranáq ki. Yiang ca sốt nehq máh yiang sâuq yõn án bữn chóc ki.”*

²³ Ngkíq Yê-su arô cũai ki toâq pở án, chơ án atõng alóí toâq parnai sacâm neq: “Nốq yiang Satan ma têq tuih tở án bữm? ²⁴ Khân bữn muoi cruang, ma manoaq rachíl manoaq, tở bữn cõt noâng cruang. ²⁵ Khân bữn muoi đống sữ, ma manoaq ralõih chóc manoaq, đống sữ ki tở bữn cõt noâng. ²⁶ Khân tốp yiang Satan, manoaq rachíl chóc manoaq, tốp ki cõt ratáh. Án tở bữn cõt tốp noâng. Án cõt pút chíq.

²⁷ “Tở bữn noau têq talõh đống cũai bán rêng khân án tở bữn chốq nhũang cũai ki. Moâm ki têq án talõh đống cũai ki cốp ít nehq crơng án.†

²⁸ “Cứq atõng anhia samoât lứq, cũai aléq ma táq lôih ntróu, cốp cũai aléq ma acrieiq ramứh Yiang Sursĩ, nehq ramứh ki Yiang Sursĩ têq táh. ²⁹ Ma cũai aléq ma acrieiq Raviei Yiang Sursĩ, Yiang Sursĩ tở nai táh lôih ki. Cũai táq ranáq ki bữn lôih mantái níc.”

³⁰ Yê-su atõng ngkíq cõ alóí ki pai neq: “Án bữn yiang sâuq.”

Mpiq Cốp Sễm Ai Yê-su

(Mathia 12:46-50; Luca 8:19-21)

³¹ Chơ mpiq cốp sễm ai Yê-su toâq pở ki. Alóí tayúng yáng tiah đống, cốp ớn noau pởq coâiq Yê-su. ³² Chửng cũai tacu pễr Yê-su. Alóí atõng

* **3:22** 3:22 Bữn noau đốq yiang Satan la ramứh yiang Bê-n-sabul hỡ. † **3:27** 3:27 Ốc ki Yê-su sacâm neq: ‘Khân cứq yoc ẽ talõh chíq crơng yiang Satan, ngkíq cóq cứq rêng hỡn tở án. Ki nốq têq talõh chíq crơng án.’

án neq: “Ki! Mpiq cốp sễm ai thâi ốt yáng tiah. Alóí yoc ễ ramóh thâi.”

³³ Yê-su blóh alóí ki: “Noau la mpiq cốp sễm ai cứq?”

³⁴ Chơ án carlang nhêng chu máh cūai tacu pễn án, cốp án pai neq: “Nâi la mpiq cốp sễm ai cứq.

³⁵ Alóí ca táq tapun ngê Yiang Sursĩ, alóí la sễm ai sễm ổi cứq, cốp mpiq cứq.”

4

Parnai Sacâm Tễ Cūai Trứh Ốc (Mathia 13:1-9; Luca 8:4-8)

¹ Yê-su tabốq atống cheq tor đờq clóng. Chứng lứq cūai toâq pữ án. Ngkíq án chổn tacu tâng tuoc ca ốt tâng đờq. Ma nheq máh cūai chứng ki ốt tâng tor đờq. ² Chơ án atống alóí sa-ữi ốc toâq parnai sacâm. Án atống neq: ³ “Anhia tamứng! Bữn manoaq cūai pữq trứh ốc. ⁴ Bo án trứh, bữn ốc satooh tâng rana. Chơ bữn chóm srúh tot cha chíq ốc ki. ⁵ Bữn ốc canốh satooh tâng cutểq cada, pựn moang lantar. Chái lứq ốc ki dát, yuaq cutểq ki tở bữn yarũ. ⁶ Ma toâq moat mandang loỏh phũac lứq, bát ki cốt khỏ, yuaq rêh án tở bữn yarũ. Án roỏh, chơ cuchít. ⁷ Bữn ốc canốh satooh tâng cutểq bữn rêh bát sarlia. Tữ bát sarlia ki dát, án éc chíq bát mbớiq dát tễ ốc cūai ki trứh. Ngkíq bát ki tở cốt palâi. ⁸ Cốp bữn ốc canốh ễn satooh tâng cutểq o. Ốc ki dát o cốp cốt palâi o. Muoi nỡm cốt pái chíq ốc. Muoi nỡm cốt tapoât chíq ốc. Muoi nỡm ễn cốt muoi culám ốc.”

⁹ Chơ Yê-su pai ẽn: “Aléq bũn cutũr yoc ẽ tamúng, ki tamúng.”

*Nốq Yê-su Atõng Parnai Sacâm
(Mathia 13:10-17; Luca 8:9-10)*

¹⁰ Toâq cũai chũng ki chu, Yê-su õt cốp muoi chít la bar náq rien tẽ án cốp yóu canõh hỡ, chơ alói blóh án tẽ parnai sacâm ki. ¹¹ Yê-su atõng alói ki neq: “Yiang Sursĩ khoi q yõn anhia dáng chơ parnai cutooq tẽ Yiang Sursĩ táq sốt; ma máh cũai canõh, alói sâng parnai ki toâq parnai sacâm sâng. ¹² Yiang Sursĩ yõn alói nhêng ma tở bũn hũm. Alói tamúng, ma tở bũn sapúh. Khân alói lứq hũm cốp lứq sâng, cõh lơ alói ẽ pih loah puai ngê Yiang Sursĩ tê, chơ Yiang Sursĩ táh lôih yõn alói tê.”[☆]

*Yê-su Aloõh Ngê Tẽ Parnai Sacâm Trứh Ốc
(Mathia 13:18-23; Luca 8:11-15)*

¹³ Yê-su blóh alói ki neq: “Khân anhia tở dáng parnai sacâm nâi, nốq tẽq anhia dáng máh parnai sacâm canõh? ¹⁴ Cũai ca trứh ốc, la án trứh parnai Yiang Sursĩ. ¹⁵ Bũn cũai samoât cutẽq noau tĩn tâng rana. Tữ noau atõng parnai Yiang Sursĩ, alói tamúng parnai ki, ma yiang Satan toâq toâp. Chơ án ỉt chíq parnai ki tẽ mút alói. ¹⁶ Bũn cũai canõh la samoât cutẽq cada, pũn moang lantar. Tữ noau atõng parnai Yiang Sursĩ, alói tamúng parnai ki, cốp chái lứq alói pruum sa-âm parnai ki bũi lứq. ¹⁷ Ma rêh alói tở bũn yarũ. Ngkíq alói tamoong mahõi

[☆] 4:12 4:12 Ê-sai 6:9-10

sâng. Khân bữn ọc túh coat ntróu toâq pở alóí cở tian alóí sa-âm parnai ki, chơ alóí tở bữn sa-âm noâng. ¹⁸ Bữn cũai canỏh la samoât cutẻq bữn rẻh bát sarlia. Tữ noau atởng parnai Yiang Sursĩ, alóí tamẻng parnai ki. ¹⁹ Ma mút alóí ốt lua cút máh ranáq tâng dỏi nâi; alóí ham sỏc bữn, cớp ham máh ranáq canỏh hỡ. Chơ máh ramứh ki ẻc chíq parnai Yiang Sursĩ, táq yỏn tở bữn cởt palâi. ²⁰ Ma bữn cũai canỏh la samoât cutẻq o. Tữ noau atởng parnai Yiang Sursĩ, alóí tamẻng cớp ỉt samoât samỡi parnai ki. Alóí cởt palâi. Muoi nỡm cởt palâi pái chíc ọc. Muoi nỡm cởt palâi tapoât chíc ọc. Muoi nỡm ẻn cởt palâi muoi culám ọc.”

*Yê-su Patâp Cỏq Cũai Pasẻq Parnai Ân
(Luca 8:6-18)*

²¹ Yê-su atởng ẻn neq: “Tở bữn noau tacât chớp tóu, chơ catứp chỏq khang, tở la đỏq nhưp cachớng bẻq. Ma lứq noau đỏq tâng rỏng. ²² Machớng ki tê, ramứh ntróu noau cutooq sanua, chumát nheq tữh cũai bữn hữm raloaih máh ramứh ki. Cớp ramứh ntróu noau táq clỏp sanua, chumát nheq tữh cũai bữn dáng ramứh ki tê.* ²³ Alẻq bữn cutửr yoc ẻ tamẻng, ki tamẻng.”

²⁴ Yê-su atởng alóí ẻn neq: “Cỏq anhia tamẻng yỏn samoât máh parnai anhia sâng cứq atởng. Malẻq anhia tamẻng tẻ parnai ki, Yiang Sursĩ yỏn anhia sapứh máh ki tê, cớp clửi tẻ ki ẻn. ²⁵ Cũai alẻq khoiẻ bữn chơ, Yiang Sursĩ yỏn án

* **4:22** 4:22 Toâq án pai ‘ramứh cutooq’ cớp ‘ramứh clỏp’ Yê-su atởng tẻ ramứh án atởng toâq parnai sacâm.

bữn sa-ũi lứq ẽn. Ma cũai aléq tở bữn bữn, máh ốc án khoiq bữn, cõt pút loah nheq.”

Parnai Sacâm Tẽ Yiang Sursĩ Táq Sốt
(*Mathia 13:31-32, 34; Luca 13:18-19*)

²⁶ Yê-su atỡng ẽn neq: “Yiang Sursĩ táq sốt la samoât riang manoaq samiang choat saro tâng sarái. Moâm án choat, chơ án chu pữ dồng. ²⁷ Sadâu án bẻq, chơ tangái án pữq táq ranáq. Ma máh saro án khoiq choat ki chống ẽ dánh bữm. Moâm án dánh, chơ án toâr achố. Ma cũai ncháu saro ki tở dánh nỏq ốc ki dánh. ²⁸ Cutẻq apu amia saro ki yỗn dánh. Nhũang lứq bữn sala. Moâm ki bữn parlúm. Ntun ẽn bữn palái. ²⁹ Toâq saro ki chĩn, ncháu ít liem pữq roaiq saro án, yuaq khoiq toâq ngư roaiq chơ.”

³⁰ Yê-su blóh ẽn: “Hái ẽ pai Yiang Sursĩ táq sốt la samoât riang ntróu? Cóp hái ẽ ít parnai sacâm ntróu dỏq atỡng tẽ sốt ki? ³¹ Sốt ki la samoât muoi ốc cuplỏq lavúng. Tữ noau trứh tâng cutẻq, ốc ki cacót clữi nheq tẽ ốc canốh. ³² Ma tữ án dánh, án toâr luat nheq tẽ nỡm bát canốh. Án cõt abẻng toâr yỗn chóm tẻq táq sóh tâng ốc abẻng án.”

³³ Yê-su atỡng parnai Yiang Sursĩ toâq sa-ũi parnai sacâm yỗn alóit tẻq dánh máh léq alóit tẻq sapúh. ³⁴ Án tở bữn atỡng alóit ntróu khân tở bữn ít parnai sacâm. Ma tữ án ốt cóp ống tốp rien tẽ án sâng, án atỡng alóit raloaih lứq tẽ máh parnai sacâm ki.

Yê-su Sươq Cuyal Cóp Dỡq
(*Mathia 8:23-27; Luca 8:22-25*)

³⁵ Tangái ki toâq nhúm-nhúm Yê-su atỡng tốp rien tể án neq: “Hái yang coah tooh ki ển.”

³⁶ Chơ alớỉ loõh tể cũai cứng, cốp asuoi Yê-su na tuoc. Bữn sa-ữỉ tuoc canõh pỡq tê. ³⁷ Ma ntun ki bữn cuyal rapuq, cốp dỡq lampóh hập lứq lampoâp tâng tuoc. Dỡq lampóh pardáih amut mán ể dớp tuoc. ³⁸ Yê-su bếq tacõl racõl pỡ soi tuoc ki. Yóu án amoaih án cốp pai neq: “Thâi oi! Thâi tỡ bữn croõq hái cheq ể cuchia tỡ?”

³⁹ Yê-su yuor tayúng sươq cuyal cốp atỡng dỡq clóng neq: “Ốt o! Mới chõỉ canoâq noâng!”

Chơ cuyal tangút, cốp cõt ien khể loah. ⁴⁰ Chơ án blớh alớỉ neq: “Nốq anhia ngcõh? Nốq anhia noâng tỡ yũah sa-âm?”

⁴¹ Ma alớỉ ki sâng dót tâng mứt. Chơ manoaq blớh manoaq neq: “Cũai nâi la noau? Nốq cuyal cốp dỡq ma tềq án!”

5

Yê-su Tuih Aloõh Yiang Sâuq Tể Tỗ Cũai
(*Mathia 8:28-34; Luca 8:26-39*)

¹ Vót Yê-su cốp tốp rien tể án khioq tacáng clóng Cali-lê, alớỉ toâq pỡ tor cruang Yê-rasê.

² Tữ Yê-su sểng tể tuoc, bo ki toâp bữn manoaq samiang ca yiang sâuq payõh loõh tể clõm cumuiq, cốp án toâq pỡ Yê-su. ³ Án ốt loâng tâng clõm cumuiq. Tỡ bữn noau tềq sacáp án noâng toâq sái-sô. ⁴ Sa-ữỉ trở chơ noau sacáp

sái-sô cốp clũong toâq panũar tâng tồ án. Ma án táq sái-sô rakiaq nheq, cốp panũar la ta-õh nheq. Tở bữn noau têq kĩaq án noâng. ⁵ Sadâu cốp tangái án õt níc tâng clõm cumuiq cốp tâng cóh. Án hễ níc, cốp án chĩc tồ án toâq tamáu yõn bớc. ⁶ Ma tữ án hữm Yê-su tễ yong, án lủh toâq pỡ Yê-su. Án sacõh racól yáng moat Yê-su. ⁷ Án hễ casang lứq neq: “Ntrớu anhia yoc ẽ táq chỏq cứq, Yê-su? Anhia la Con Yiang Sursĩ, án ca sớt clũi nheq tễ canõh. Cứq sễq anhia yáng moat Yiang Sursĩ, chõi táq tởiq bap cứq.”

⁸ Án pai ngkíq yuaq án khoiq sâng chớ Yê-su ớn án neq: “Yiang sâuq ơ! Mới loõh chítq tễ tồ cũai nãi.”

⁹ Chớ Yê-su blớh án: “Ntrớu ramứh mới?”

Yiang sâuq ki ta-õi: “Hếq clứng lứq. Ngkíq ramứh cứq la Poâl.”

¹⁰ Cũai ca bữn yiang sâuq ki sễq tễ Yê-su, chõi tuih yiang sâuq tễ cruang ki. ¹¹ Cheq ki bữn cóh, bữn muoi cantóh alic õt chuaq cha. ¹² Ngkíq máh yiang sâuq ki sễq tễ Yê-su neq: “Yõn hếq mut tâng cantóh alic ki.”

¹³ Yê-su yõn alới mut. Ngkíq yiang sâuq loõh tễ tồ cũai ki, chớ mut tâng cantóh alic ẽn. Cantóh alic ki lủh chái lứq tễ leh tarhar cốp pống chu clóng đớq, chớ cuchĩt clooc nheq. Alic ki sám bar ngin lám.

¹⁴ Máh cũai bán alic lủh achu pỡ vil, atõng yóu tâng vil cốp yóu ca õt pỡ rapoq sarái tễ máh ranáq alới khoiq hữm. Máh cũai ki toâq salĩq,

ntróu ca táq cóp máh alic. ¹⁵ Tữ alóí toâq pở Yê-su, alóí hữm cũai bữn poâl yiang sâuq payóh tễ nhũang, ốt tacu pở ki. Ân tac tampác cóp tở bữn yúh noâng. Ngkíq alóí sâng ngcòh lứq. ¹⁶ Máh cũai ca hữm Yê-su táq chóq cũai bữn yiang sâuq cóp chóq tốp alic, alóí ki atỡng yỗn cũai canõh dáng tê.

¹⁷ Chơ máh cũai ki sễq Yê-su loõh tễ cruang alóí. ¹⁸ Ngkíq Yê-su chõn loah tâng tuoc sĩa. Bo ki toâp cũai bữn yiang sâuq tễ nhũang ki toâq pở Yê-su, cóp sễq pởq cóp Yê-su tê. ¹⁹ Ma Yê-su tở yỗn án pởq, cóp atỡng án neq: “Mới chu pở đống mới. Mới atỡng yỗn yóu mới dáng tê tễ máh ranáq Ncháu khoi q táq yỗn mới, cõ án sarũiq táq mới.”

²⁰ Ngkíq cũai ki chu. Ân atỡng yỗn máh yóu án tâng cruang De-ca-palot dáng tễ ranáq Yê-su khoi q táq chuai án. Nheq tữh alóí sâng dót lứq.

*Yê-su Táq Bán Con Mansễm Yaru Cóp Mansễm
Canõh Ca Satoaq Au Tuar Án
(Mathia 9:18-26; Luca 8:40-56)*

²¹ Vót ki Yê-su chõn tâng tuoc cóp píp loah pở tor yáng ki. Tữ Yê-su toâq pở tor, bữn clúng lứq cũai toâq pở án. ²² Bữn manoaq samiang ndõm muoi đống sang tốp I-sarel, ramứh Yaru. Ân sacõh racól cóp pũp cheq ayững Yê-su. ²³ Ân sễq cucõh Yê-su neq: “Con mansễm cứq a-ĩ tráuq lứq cheq cuchĩt chơ. Cứq sễq thài toâq satoaq atĩ tâng tở án yỗn án cõt bán cóp têq tamooong.”

²⁴ Ngkíq Yê-su pǝq cǝp án. Clúng cũai canǝh puai Yê-su tê. Alói ǝt chũop nheq tǝ Yê-su, cǝp alói nêt án hǝ.

²⁵ Bǝn manoaq mansêm bǝn a-ĩ toǝh siet khoiq muoi chít la bar cumo chǝ, ma aham tǝ nai yǝt.

²⁶ Án khoiq pǝq ramóh sa-ũĩ náq cũai cǝp chĩuq sa-ũĩ ramúh alói palai án. Án pút nheq práq đǝq chǝng rahâu, ma tǝ hǝm khaq ntrúu. Cǝp án a-ĩ hǝn tǝ nhũang ẽn. ²⁷ Tǝ án sâng noau táq ntǝng tǝ Yê-su, án pǝq ǝt mpúng dĩ cũai clúng ki. Án toáq ǝt yáng cĩ Yê-su; chǝ án satoaq tuoq au tuar Yê-su. ²⁸ Án chanchóm neq: “Khân cúq satoaq tampác Yê-su, cúq lúq cǝt bán.”

²⁹ Bo ki toáp aham yǝt, cǝp án sâng tâng tǝ án tǝ bǝn a-ĩ noâng. ³⁰ Yê-su dáng toáp chǝc loǝh tǝ tǝ án yǝn táq ranáq nâi. Ngkíq án píp nhêng cũai clúng, chǝ blóh: “Noau satoaq au cúq?”

³¹ Tǝp rien tǝ Yê-su ta-ǝi: “Thâi hǝm chǝ clúng cũai nêt thâi. Nǝq noâng thâi blóh: ‘Noau satoaq cúq?’ ”

³² Ma Yê-su luliaq nhêng chu máh cũai clúng ki yoc ẽ dáng noau satoaq au án. ³³ Mansêm ki cangcoaih ngcǝh lúq, yuaq án dáng cǝ án satoaq tuoq au Yê-su án bǝn cǝt bán. Chǝ án toáq pǝ Yê-su, cǝp pǝp asêng tǝ án cheq ayǝng Yê-su. Án atǝng Yê-su tanoang lúq. ³⁴ Chǝ Yê-su atǝng án neq: “Niang ǝi! Cǝ mới sa-âm, tǝ mới cǝt bán. Mới chu ien khẽ. Mới tǝ bǝn cǝt a-ĩ nneq noâng.”

³⁵ Bo Yê-su noâng táq ntǝng cǝp mansêm ki, bǝn cũai toáq tǝ đǝng Yaru, án ca ndǝm muoi

dống sang tốp I-sarel. Cũai ki atõng Yaru neq: “Con mansẽm mới khoiq cuchĩt chơ. Nỗq mới noâng pakhoq thài?”

³⁶ Ma Yê-su tỡ bữn ramíng tẽ santoiq alóit atõng. Án atõng Yaru neq: “Chõĩ ngcõh, mới sa-âm sâng.”

³⁷ Vót ki Yê-su yõn Phi-er, Yacõ, cớp Yang la a-ẽm Yacõ, pợq núng án. Mách cũai canõh Yê-su tỡ yõn pợq. ³⁸ Tỡ alóit toáq pỡ dống Yaru, Yê-su hữm clúng cũai nhiam atẽh, cớp u-õĩ casang lứq. ³⁹ Án mut tâng dống, chơ án blớh alóit neq: “Nỗq anhia nhiam u-õĩ casang lứq? Con ki tỡ bữn cuchĩt mỗ. Án bẻq sâng.”

⁴⁰ Ma alóit ayê ra-ac Yê-su. Ngkíq Yê-su tuih aloõh nheq alóit tẽ dống. Án dũng mpiq mpoaq mansẽm ki cớp tốp rien tẽ án mut chu ntốq noau đợq cumuiq ki. ⁴¹ Án tếc atĩ amốq ki, cớp pai chóq amốq ki neq: “Tali-tha cumi.” Santoiq nãi parlong loah la neq: “Amốq ơi! Mới yuor tayúng!”

⁴² Bo ki toáp amốq ki yuor tayúng. Cớp tẽq án pupợq. Anhúq án bữn muoi chít la bar cumo. Mách cũai ốt ngki sâng dót lứq tỡ alóit hữm amốq ki bữn tamoong loah. ⁴³ Ma Yê-su patáp alóit neq: “Chõĩ atõng ranáq nãi yõn cũai canõh dáng. Anhia ỉt cớng sana yõn amốq nãi cha.”

6

*Cũai Tâng Vil Na-sarẽt Tỡ Bữn Yám Yê-su
(Mathia 13:53-58; Luca 4:16-30)*

¹ Vót ki Yê-su loõh tễ ntốq ki, chu loah pờ vil án, la vil Na-sarết. Tốp rien tễ án pờq nứng án tề.

² Toâq Tangái Rlu án pờq atỡng tâng đống sang tốp I-sarel. Nheq tữh cũai ca tamứng án atỡng sâng dót lứq. Alói rablớh neq: “Tễ léq cũai nâi bữn santoiq nneq? Nốq án bữn ốc rangoaiq sa-ữi lứq? Cóp án táq sa-ữi ranáq salễh.”

³ Cóp alói pai ễn: “Lứq ma tở bữn, án nâi la cũai Chiang táq pian, con Mari, ai alói Yacỗ, Yô-sê, Yude,* cóp Si-môn? Cóp amuaq án ốt nứng hái tề.”

Chơ alói mumat Yê-su, cỗ alói sâng ũan lứq án atỡng ngkíq.

⁴ Yê-su atỡng alói neq: “Khân bữn manoaq cũai tang bỗq Yiang Sursĩ pờq atỡng tâng vil canốh, máh cũai tâng vil ki lứq yám noap án. Ma khân án atỡng tâng vil án bữm, tâng sâu án bữm, cóp tâng đống sũ án bữm, alói ki tở bữn yám noap án.”

⁵ Ngkíq Yê-su tở tềq táq sa-ữi ranáq salễh tâng vil án. Ma án satoaq atĩ tâng pái pổn náq cũai a-ĩ, cóp táq yỗn alói cốt bán. ⁶ Yê-su sâng dót lứq yuaq cũai tâng vil ki tở bữn sa-âm. Chơ án pờq atỡng máh vil mpễr ki ễn.

Yê-su Ớn Tốp Muoi Chít La Bar Náq Pờq Atỡng (Mathia 10:5-15; Luca 9:1-6)

⁷ Yê-su arô tốp muoi chít la bar náq rien tễ án; cóp án ớn alói pờq chu nâi pờq chu tih, bar náq pờq parnoi muoi rana. Án yỗn alói bữn chóc

* 6:3 6:3 Yude nâi noau đốq Yuda hỡ.

tuih yang sâuq. ⁸ Án patâp alóí neq: “Anhia chõĩ dũng crong ntróu. Chõĩ dũng crong sana; chõĩ poac tũĩ; cớp chõĩ chóq práq tâng toai. Anhia dũng manoaq muoi ntreh ralõng sâng. ⁹ Cớp, têq anhia sóp. Ma chõĩ sóp bar ploah au.”

¹⁰ Chơ án patâp alóí ẽn neq: “Toâq anhia mut tâng muoi vil, anhia õt muoi dõng sâng toau toâq tangái anhia loõh tẽ vil ki. ¹¹ Khân anhia mut tâng vil, ma noau tở bữn roap cớp tabõp tabéh o anhia cớp noau tở ẽq tamúng sântoíq anhia, toâq anhia loõh tẽ vil ki, cóq anhia trutrếh phón cutẽq tẽ ayũng. Ranáq nâi cõt tếc cũai tâng vil ki tở bữn roap anhia.”

¹² Ngkíq muoi chít la bar náq loõh tẽ ki. Alóí atõng máh cũai cóq alóí ngin lôih lêq cõt mút tamái ẽn. ¹³ Alóí tuih aloõh sa-ũĩ yang sâuq. Cớp alóí atia dờq nsẽng o-li-vê tâng sa-ũĩ tở cũai a-ĩ yõn alóí cõt bán.

*Hê-rôt Cachĩt Yang, Án Ca Táq Batẽm
(Mathia 14:1-12; Luca 9:7-9)*

¹⁴ Puo Hê-rôt khoíq sâng tẽ máh ranáq alóí táq, yuaq ramứh Yê-su cõt trởh la-ũt la-ũĩ cu vil. Bữn cũai pai neq: “Yang ca dỏq táq batẽm, khoíq yuor tamõng loah tẽ ping. Yuaq ngkíq án bữn chóc têq táq sa-ũĩ ranáq salẽh.”

¹⁵ Ma bữn cũai canõh pai neq: “Án la Ê-li.”

Bữn cũai canõh ẽn pai: “Án la manoaq cũai tang bớq Yiang Sursĩ, samoat cũai tang bớq Yiang Sursĩ tẽ mbớq tê.”

16 Ma từ Hê-rôt sông noau atỡng tể Yê-su, án pai neq: “Yang khoiq cứq ón noau cõh tacong tể nhũang, sanua án tamoong loah.”

17 Hê-rôt pai ngkíq, yuaq án khoiq yõn tahan cõp Yang, cõp chóc tâng cuaq tũ. Án táq ngkíq cõ tian Hê-rô-dia, lacuoi án, sông ùan lứq chóc Yang. Dâu lứq Hê-rô-dia nâi la lacuoi Phi-líp, a-êm Hê-rôt. Ma Hê-rôt ãt mansẽm ki táq lacuoi án ẽn. 18 Yang khoiq atỡng Hê-rôt neq: “Yiang Sursĩ tở ẽq mới ãt lacuoi a-êm mới.”

19 Cõ ngkíq Hê-rô-dia sông ùan lứq chóc Yang, cõp án ẽ cachĩt Yang. 20 Ma án tở têq, yuaq Hê-rôt ngcõh Yang, cõ án dáng Yang la cũai tanoang cõp tở bữn lôi. Ngkíq Hê-rôt đõq Yang yõn õt ien khẽ. Từ Hê-rôt tamứng Yang táq ntỡng, án cõt bar mút. Ma án yoc lứq tamứng máh santoiq Yang atỡng.

21 Ma tangái Hê-rô-dia bữn táq Yang, la tangái Hê-rôt cha sanhữ mpiq canõt án. Ngkíq án táq muoi pêl toâr đõq cha bũi cõp máh cũai sốt pũn án, sốt tahan, cõp cũai bữn chóc lứq tâng cruang Cali-lê. 22 Từ con mansẽm Hê-rô-dia mut pở clõng noau cha, án puan sarai. Hê-rôt cõp tamoi, alới sông bũi lứq tể con Hê-rô-dia puan. Ngkíq Hê-rôt atỡng mansẽm ki neq: “Ntróu mới yoc ẽ bữn, mới sẽq tể cứq. Cứq lứq yõn mới aki.”

23 Hê-rôt thể dũan cõp mansẽm ki neq: “Ntróu mới sẽq tể cứq, cứq yõn mới ramứh ki. Khân mới yoc ẽ bữn muoi saráh cruang cứq, la cứq yõn mới.”

24 Mansẽm ki loõh tẽ ki, põq blõh mpiq án: “Ramúh ntróu mới yoc cúq sêq tẽ án?”

Mpiq án ta-õi: “Mới sêq plõ Yang ca dóq táq batẽm.”

25 Mansẽm ki lúh põq sêq toáp tẽ puo Hê-rõt neq: “Cúq sêq plõ Yang dóq táq batẽm. Sêq mới chóq plõ án tâng padien sanua toáp.”

26 Puo sâng ngua lúq, ma cõ án khoiq thẽ dũan yáng moat máh cũai tamoi, ngkíq án tở ẽq táh parnai án khoiq ữq cóp mansẽm ki. 27 Chơ puo ớn tahan põq toáp dũng plõ Yang toáp põ án. Tahan ki mut cõh tacong Yang tâng cuaq, 28 chơ dũng achu plõ Yang tâng padien. Hê-rõt dũng põ mansẽm ki, cóp mansẽm ki dũng achu yõn mpiq án.

29 Tữ máh tốp rien tẽ Yang sâng cõt ranáq ngkíq, alóí toáp ít tở Yang dũng túp tâng ping.

Yê-su Siem Sõng Ngìn Náq Cũai

(Mathia 14:13-21; Luca 9:10-17; Yang 6:1-14)

30 Máh cũai ayũng atĩ, ca Yê-su khoiq ớn põq atõng tâng dũ vil tẽ nhũang, alóí pích chu loah põ Yê-su. Alóí atõng án tẽ nheq ranáq alóí khoiq táq, cóp nheq santoiq alóí khoiq atõng. 31 Yê-su atõng loah alóí neq: “Hái põq ống hái sâng chu ntóq tở bũn noau õt. Hái õt rlu ngki voai.”

Án pai ngkíq yuaq cứng lúq cũai luloah põq chu níc, toau alóí ốq dẽh chi-cha. 32 Chơ alóí chõn tâng tuoc ống alóí sâng, ẽ põq muoi ntóq tở bũn noau õt. 33 Ma cứng cũai hũm alóí põq cóp saccoal alóí. Ngkíq máh cũai ki lúh tẽ vil,

põq crõq põ ntõq Yê-su ẽ toâq. ³⁴ Tữ Yê-su sêng tẽ tuoc, án hữm cứng lứq cũai. Án sâng sarũiq táq chõq máh cũai cứng ki, yuaq alõi la samoât riang charán cữu ỏq cũai mantán. Chơ án tabõq atõng alõi sa-ũĩ ramứh. ³⁵ Cheq moat mandang tahõr, tốp rien tẽ Yê-su toâq põ án, cớp atõng án neq: “Ntõq nâi yõng tẽ ntõq cũai õt, cớp moat mandang cheq sadâu. ³⁶ Sẻq thâi ớn máh cũai nâi chu cớp mut tâng vil mpễr nâi dõq alõi chõng bữm crõng sana cha.”

³⁷ Ma Yê-su atõng alõi neq: “Anhia toâp yõn alõi bữn crõng sana cha.”

Ngkíq alõi blớh Yê-su: “Thâi yoc hẻq pỏq chõng sana toâq bar culám ỏc práq† dõq bữn dũ yõn alõi cha tỡ?”

³⁸ Yê-su blớh loah alõi neq: “Sẻq lám bẻng anhia bữn? Anhia pỏq nhêng voai.”

Tữ alõi nhêng, alõi pai neq: “Hẻq bữn sỡng lám bẻng cớp bar lám sĩaq.”

³⁹ Chơ Yê-su ớn tốp rien tẽ án tampẻq cũai cõt tốp, chơ yõn alõi tacu tâng bát sanlan. ⁴⁰ Ngkíq alõi tacu bữn sa-ũĩ tốp. Muoi tốp bữn muoi culám náq. Muoi tốp bữn sỡng chít náq. ⁴¹ Yê-su ít sỡng lám bẻng cớp bar lám sĩaq, chơ án tapoang achõn chu paloõng cớp sa-õn Yiang Sursĩ yõn bữn crõng cha nâi. Moâm ki án pĩh bẻng cớp chiau yõn tốp rien tẽ án tampẻq yõn máh cũai cha. Án tampẻq bar lám sĩaq hỡ yõn

† **6:37** 6:37 Tâng parnai Créc noau dõq ỏc práq la ‘daniei’, cớp muoi ỏc daniei la cóng noau tuthẻ muoi tangái.

alói cha. ⁴² Dũ náq cũai cha pasâi nheq. ⁴³ Moâm alói cha, tốp rien tễ Yê-su parôm loah máh bêng cốp sĩaq clũi tễ alói cha bữn muoi chít la bar crưo. ⁴⁴ Máh cũai carsai samiang ca cha bêng ki, sám sỡng ngìn náq.

*Yê-su Pỡq Ayững Tâng Cloong Dỡq
(Mathia 14:22-33; Yang 6:16-21)*

⁴⁵ Moâm ki Yê-su ớn tốp rien tễ án chồn tâng tuoc cốp pỡq nhũang án pỡ tor yáng tooh ki pỡ vil Bet-sada. Chơ án ớn máh cũai clững ki chu pỡ vil alói. ⁴⁶ Vót alói chu, án chồn tâng cóh ẽ câu ngki. ⁴⁷ Toâq khoiq sadâu chơ tốp rien tễ Yê-su ốt tâng tuoc tâng mpững dĩ clóng. Ma Yê-su ốt manoaq án tâng cutễq. ⁴⁸ Yê-su hữm tốp rien tễ án voah tuoc túh coat lứq, yuaq cuyal ốt ploaq níc tuoc alói. Paloỡng cheq rừm-rừm chơ, Yê-su toâq pỡ alói. Án pỡq ayững tâng cloong dỡq. Án táq nan pỡq luat alói. ⁴⁹ Ma tử alói hữm án pỡq ayững tâng cloong dỡq, alói chanchóm pai yiang cumuiq; chơ alói hẽ casang lứq, ⁵⁰ yuaq dũ náq alói hữm nheq, cốp alói sâng ngcõh lứq. Ma bo ki toâp Yê-su pai chóq alói neq: “Yỗn mút anhia ốt ien khẽ. Nâi la tỗ cứq. Chõi ngcõh ntrứu.”

⁵¹ Chơ án chồn tâng tuoc ốt cốp alói tê, cốp cuyal tangút. Alói sâng dốt lứq tâng mút, ⁵² yuaq alói tỡ bữn sapúh tễ ranáq Yê-su táq bo án pĩh bêng tangái nhũang ki. Mút alói noâng coang.

*Yê-su Chuai Cũai A-ĩ Tâng Cruang Canê-saret
(Mathia 14:34-36)*

⁵³ Chơ alói clong đờq ki toàq pờ cruang Canê-saret, cớp alói chốq tuoc tâng tor. ⁵⁴ Tữ alói sễng tễ tuoc, máh cũai sacoal toáp Yê-su. ⁵⁵ Chơ alói miar lúh chu vil alói, cớp đưng cũai a-ĩ chốq tâng cantrang. Khân alói sâng Yê-su ốt pờ ntốq aléq, alói đưng chu ntốq ki. ⁵⁶ Pờ ntốq léq Yê-su pờq, tam vil cốt, vil toâr, tở la máh rapoq, noau đưng cũai a-ĩ parôm pờ ntốq ki. Alói sễq tễ Yê-su yỗn máh cũai a-ĩ tềq satoaq chểu au tuar án. Aléq satoaq, tở án cốt bán.

7

Yê-su Atỡng Tễ Rit Achúc Achiac (*Mathia 15:1-9*)

¹ Bữn cũai tễ tốp Pha-rasi cớp cũai yống rit toàq tễ vil Yaru-salem ốt rôm pờ Yê-su. ² Alói hữm bữn cũai tễ tốp rien tễ Yê-su chi-cha ma tở bữn ariau atĩ puai phễp rit. ³ Tốp Pha-rasi cớp nheq máh cũai I-sarel, khân alói tở bữn ariau atĩ, alói tở bữn chi-cha. Ngkíq alói puai rit achúc achiac tễ mbốq samoât lứq. ⁴ Tữ alói chu tễ đổng, khân atĩ alói tở bữn ariau, ki alói tở tềq chi-cha. Cớp bữn sa-ữi rit canốh hỡ alói đốq trỉh, ariang rit ariau adéh tangan. ⁵ Ngkíq máh cũai Pha-rasi cớp cũai yống rit blóh Yê-su neq: “Nốq tốp rien tễ thâi tở bữn puai rit achúc achiac hái? Nốq alói chi-cha ma tở bữn ariau atĩ puai phễp rit?”

⁶ Yê-su ta-õi alói neq: “Tễ mbốq Ê-sai atỡng khoiq pñeiq lứq tễ anhia la cũai táq nan sâng. Yiang Sursĩ ớn án chĩc neq:

‘Máh cūai nâi khễn cứq ống bỗq sâng,
ma mút pahõm alóit õt yong tễ cứq.

⁷ Alóit sang cứq, ma alóit sang tở cõt ố.

Alóit atõng rit cớp phễp rit cūai chõng aloõh sâng.’ ”

⁸ Cớp Yê-su atõng ễn neq: “Anhia khoiq táh máh ngê Yiang Sursĩ ma anhia yõng pacái lứq máh phễp rit cūai.”

⁹ Chơ Yê-su achũor alóit neq: “Pĩeiq ơiq! Cứq hữm anhia táq o lứq táh chíq ngê Yiang Sursĩ. Ma anhia yõng phễp rit cūai pacái lứq. ¹⁰ Mõi-se khoiq atõng chơ neq:

‘Cóq anhia yám noap mpiq mpoaq anhia. Khân cūai aléq ma lóc acrieiq mpiq mpoaq, cūai ki cóq chũuq cuchĩt.’[☆]

¹¹ Ma anhia atõng têq noau pai chóq mpiq mpoaq neq: ‘Máh ramứh cứq têq chuai anhia, ki cứq khoiq “côr-ban” chơ.’ (Santoiq ‘côr-ban’ parlong loah la ‘khoiq ữq sang yõn Yiang Sursĩ chơ.’) ¹² Anhia pai ngkíq, la anhia tở yõn cūai nâi chuai mpiq mpoaq án. ¹³ Ngkíq anhia khoiq táh chơ santoiq Yiang Sursĩ, ma anhia patõng níc rit anhia bữm. Cớp anhia táq sa-ũĩ ranáq ngkíq tê.”

Ntróu Táq Yõn Cūai Cõt Sâuq
(*Mathia 15:10-20*)

¹⁴ Moâm ki Yê-su arô loah cūai clững yõn toáq pở án. Cớp án atõng alóit neq: “Nheq tữh anhia cóq tamứng cứq. Cóq anhia dáng yõn raloaih.

[☆] **7:10** 7:10 Loõh Tễ Ê-yip-tô 20:12; 21:17; Patâp Loah 5:16; Lê-vi 20:9

15 Túc ramúh máh crơng tễ yáng tiah tở bữn táq yỗn cũai cốt lôih. Ma ngê ca loỏh tễ mút cũai táq yỗn cũai cốt lôih. 16 Aléq bữn cutữr yoc ẽ tamứng, ki tamứng.”*

17 Tữ Yê-su loỏh tễ cũai cứng, chơ mut tâng đống, tốp rien tễ án blớh án tễ parnai sacâm ki. 18 Yê-su blớh loah alới neq: “Nỏq anhia tở yũah sapúh sĩa? Anhia dáng ma tở bữn, crơng sana tễ yáng tiah mut tâng púng tở nai táq yỗn cũai cốt sâuq? 19 Lứq samoât crơng ki tở bữn mut tâng mút. Ma án mut tâng púng sâng, chơ loỏh na parnỏq.”

20 Cóp Yê-su atớng ẽn neq: “Ngê ntrớu ca loỏh tễ mút cũai, ngê ki táq yỗn cũai cốt sâuq. 21 Yuaq ngê loỏh tễ mút cũai la neq: chanchỏm ranáq sâuq, tở bữn lacuoi cayac ma bẻq parnỏi, tutuoiq, cachĩt cũai, 22 cooc lacuoi tở la cayac noau, ham crơng yóu, táq pampła, cakéq, táq tanghang, sa-on cumíq, lóc acrieiq, ẽq noau khẽn ẽq noau yám, cốp táq yúh-yúh. 23 Nheq tữh máh ranáq lôih nãi loỏh tễ mút cũai cốp táq yỗn cũai cốt sâuq.”

*Manoaq Mansẽm Sa-âm Lứq
(Mathia 15:21-28)*

24 Moâm Yê-su pai ngkíq án loỏh tễ ki, pờq chu cruang pẻr vil Ti-rơ cốp vil Sadôn. Án mut tâng muoi đống. Án tở ẽq cũai canỏh dáng án ớt pờ ki, ma án tở tẻq cutooq tở án. 25 Bữn mansẽm

* 7:16 7:16 Sa-ũĩ tâm saráq tiaq tở bữn bữn rana 16 nãi.

toàq ap muoi tatúp cheq ayũng án. Mansẽm nài khoiq sãng tẽ ranáq Yê-su táq, cốp án bữn muoi lám con mansẽm bữn yiang sàuq payõh. ²⁶ Mansẽm ki la cũai Créc, khoiq canõt tâng cruang Si-ri Phê-nasi. Án sễq Yê-su tuih aloõh yiang sàuq tẽ tũ con án. ²⁷ Ma Yê-su ta-õi án neq: “P̄ieiq lứq la cóq yõn carnẽn chi-cha moâm voai. Tỡ p̄ieiq ãt crong sana carnẽn, chơ tời yõn acho cha.”

²⁸ Mansẽm ki ta-õi Yê-su: “Lứq p̄ieiq Ncháu pai. Ma acho tẽq cha máh rabéq rayâl sarũoi pũn cachơng cha.”

²⁹ Chơ Yê-su atõng mansẽm ki neq: “Yuaq mới pai ngíq, sanua tẽq mới chu. Yiang sàuq khoiq loõh chơ tẽ tũ con mới.”

³⁰ Ngíq mansẽm ki chu pỡ dõng. Án hữm con án bẻq tâng cachơng. Cốp yiang sàuq khoiq loõh chơ tẽ tũ con án.

Yê-su Táq Bán Cũai Túng Cốp Plỏq

³¹ Moâm ki Yê-su loõh tẽ raloan cutẽq vil Ti-rơ. Án pỡq luat vil Sadôn, cốp án pha cruang De-capalõt toàq pỡ clóng Cali-lê. ³² Noau dũng atoàq pỡ án manoaq cũai cutũr túng cốp bỗq plỏq. Alớ sễq Yê-su satoaq atĩ tâng tũ cũai ki yõn án tẽq bán nheq. ³³ Yê-su dũng aloõh ớng manoaq cũai ki tẽ cũai clũng; chơ án chũaiq bar coah ndẽm atĩ tâng hõng cutũr cũai ki. Cốp Yê-su cuchóh cốp atia dỡq viaq tâng lieih cũai ki. ³⁴ Chơ Yê-su tapoang achõn chu paloõng. Án tangũh cusõh, chơ án atõng cũai ki neq: “Ep-phata.” Santoiq nài parlong loah la: “Cóq pớh chíq!”

³⁵ Bo ki toâp cutũr cũai ki têq sânq, cốp lieih án cõt lamên. Án têq táq ntõng raloaih loah. ³⁶ Yê-su sươq alóí chõỉ atõng yõn cũai canõh dáng. Ma tam Yê-su sươq alóí máh léq, alóí atõng lứq-lơ máh ki ẽn. ³⁷ Alóí sânq dót lứq tâng mút, cốp alóí pai neq: “Máh ranáq án táq la o nheq. Án táq yõn cũai túng têq sânq, cốp cũai plốq têq táq ntõng.”

8

Yê-su Siem Põn Ngìn Náq (*Mathia 15:32-39*)

¹ Tâng máh tangái ki cũai cứng toâq sĩa pở Yê-su. Yuaq alóí ốq crơng sana cha, ngkíq Yê-su arô tốp rien tẽ án toâq pở án, cốp atõng alóí neq: ² “Cứq sânq sarũiq táq lứq cũai cứng nâi, yuaq alóí ốt cốp cứq khoiq pái tangái chơ, ma alóí ốq crơng sana cha. ³ Khân cứq ớn alóí chu pở đồng alóí, ma púng alóí khoiq panhieih, ngkếq alóí dóm veq tâng rana, yuaq sa-ũỉ náq tẽ alóí toâq tẽ vil yơng.”

⁴ Tốp rien tẽ án blớh loah án neq: “Nốq hái ẽ táq dồq bữn crơng sana siem máh cũai nâi yõn cha pasâi, yuaq ntốq nâi yơng lứq tẽ vil cũai ốt?”

⁵ Yê-su blớh loah alóí: “Sếq lám bẽng anhia bữn?”

Alóí ta-õỉ: “Tapul lám.”

⁶ Chơ Yê-su ớn nheq tữh cũai tacu tâng cutẽq. Án ỉt tapul lám bẽng ki, cốp án sa-õn Yiang Sursĩ yõn bữn crơng cha nâi. Moâm ki án pĩh bẽng cốp avoi yõn tốp rien tẽ án tampẽq yõn máh cũai

cha. Chơ tốp rien tể án tampêq yõn máh cũai ki. ⁷ Alói bữn bar pái lám sĩaq cacót hỡ. Yê-su sa-õn Yiang Sursĩ yõn bữn crong sana nâi, chơ án ớn tốp rien tể án tampêq sĩaq hỡ. ⁸ Toâq nheq tửh cũai cha pasâi, tốp rien tể Yê-su parõm loah crong sana clũi tể alói cha, bữn poân loah tapul cruo. ⁹ Máh cũai carsai samiang tâng ntốq ki bữn sám põn ngin náq. Chơ Yê-su ớn cũai clứng ki chu loah pỡ đống alói. ¹⁰ Vớt ki án chõn tâng tuoc cớp tốp rien tể án, cớp alói pỡq chu cruang Dal-manu-tha ễn.

Tốp Pha-rasi Blóh Tể Tể Yê-su
(*Mathia 12:38-40; Luca 12:54-56; 16:1-4*)

¹¹ Bữn cũai tể tốp Pha-rasi toâq pỡ Yê-su rasuon cớp án. Alói sễq tể Yê-su muoi tểc salễh yoc ễ dáng chớc án toâq tể Yiang Sursĩ, ma tỡ bữn. Alói yoc ễ chim Yê-su. ¹² Yê-su tangứh cusốh, chơ án ta-õi alói neq: “Nốq cũai tâng dõi nâi chuaq níc tểc salễh tể cớq? Cớq atõng anhia samoât lứq, cớq tỡ bữn yõn cũai ớt tâng dõi nâi bữn tểc ntrứu.”

¹³ Moâm án pai ngkíq, chơ án loõh tể alói. Án chõn loah tâng tuoc clong chu tor yáng ki.

Yê-su Atõng Tể Ranáq Hê-rôt Cớp Tốp Pha-rasi
(*Mathia 16:5-12*)

¹⁴ Tốp rien tể Yê-su khlĩr dứng bễng. Alói bữn ống muoi lám bễng sâng tâng tuoc. ¹⁵ Chơ Yê-su sườq alói neq: “Cớq anhia ớt yõn khểuq. Cớq

anhia ốt yong tẽ crong táq yõn bẽng mi cõt pluoih tẽ tốp Pha-rasi cốp tẽ Hê-rôt.”

¹⁶ Ngkíq alói manoaq táq ntõng cốp manoaq neq: “Án atõng ngkíq yuaq hái tở bữn bữn bẽng.”

¹⁷ Yê-su sâng alói pai ngkíq, chơ án blóh alói neq: “Nỏq anhia ốt táq ntõng pai hái tở bữn bẽng cha? Nỏq anhia noâng tở yũah sâng, tở yũah dáng sĩa? Mút anhia noâng coang tở?”

¹⁸ Nỏq anhia bữn moat, ma tở bữn hữm? Anhia bữn cutũr, ma tở bữn sâng? Anhia sanhũ ma tở bữn? ¹⁹ Bo cứq pĩh sõng lám bẽng, chơ siem sõng ngin náq, sếq crưo anhia parõm loah tẽ máh ngcáh anhia cha?”

Alói ta-õi án neq: “Muoi chít la bar crưo.”

²⁰ Yê-su blóh sĩa: “Cốp bo cứq pĩh tapul lám bẽng, chơ siem põn ngin náq, sếq crưo anhia parõm loah máh ngcáh anhia cha?”

Alói ta-õi án neq: “Tapul crưo.”

²¹ Yê-su blóh loah alói neq: “Anhia sapúh ma tở yũah?”

Yê-su Táq Bán Manoaq Cũai Sũt

²² Vót ki alói toâq pở vil Bet-sada. Noau dững atoâq pở Yê-su manoaq cũai sũt, cốp alói sếq Yê-su satoaq án. ²³ Yê-su tếc atĩ cũai sũt ki cốp dững án loõh yáng tiah vil. Moâm ki Yê-su pruih đõq viaq tâng moat cũai sũt cốp satoaq tở án, chơ blóh cũai sũt ki neq: “Mới hữm ntrầu tở?”

²⁴ Cũai ki tangõq achõn, chơ án ta-õi neq: “Cứq hữm cũai pupõq. Ma cứq hữm alói tở raloaih, ariang pai aluang pupõq tưng-tooc.”

25 Yê-su satoaq atĩ án tâng moat cũai sũt ki muoi trõ ẽn. Ngkĩq cũai ki nhêng cloân. Moat án cõt poang loah, cốp án hũm raloaih dũ ramúh. 26 Yê-su ớn án chu loah pữ đống, cốp patâp án neq: “Chõĩ atõng yõn cũai tâng vil dáng tẽ ranáq nãi.”

*Yê-su Atõng Tẽ Án Chũuq Cuchĩt
(Mathia 16:13-23; Luca 9:18-21)*

27 Vót ki Yê-su pữq loah cốp tốp rien tẽ án. Alóĩ mut máh vil tâng cruang Sê-sarê Phi-lip. Bo alóĩ pữq tâng rana, Yê-su blóh tốp rien tẽ án neq: “Cũai đốq pai cứq la noau?”

28 Alóĩ ta-õĩ án neq: “Bữn cũai pai thâi la Yang đốq táq batẽm. Bữn cũai pai thâi la Ê-li. Cốp bữn cũai canõh ẽn pai thâi la manoaq tang bõq Yiang Sursĩ.”

29 Yê-su blóh alóĩ ẽn neq: “Ma anhia pai cứq la noau?”

Phi-er ta-õĩ án: “Thâi la Crĩt, án ca Yiang Sursĩ ruroh đốq chuai amoong cũai.”

30 Chơ Yê-su patâp alóĩ tở yõn cũai canõh dáng ốc nãi. 31 Moâm ki Yê-su tabõq atõng tốp rien tẽ án neq: “Chumat cứq Con Yiang Cõt Cũai cóq chũuq sa-ũĩ ramúh túh coat. Cũai sốt nheq sâu, máh cũai sốt tốp tẽng rit sang Yiang Sursĩ, cốp máh cũai yõng rit, alóĩ ẽ kêt lữq cứq cốp cachĩt cứq. Ma vót pái tangái cứq tamoong loah.”

32 Yê-su atõng parnai nãi raloaih lữq. Moâm ki, Phi-er yõn Yê-su loõh táq ntõng cốp án; chơ án sươq Yê-su, tở yõn án táq ntõng ngkĩq. 33 Ma Yê-su luliaq nhêng chu tốp rien tẽ án, cốp án

suroq Phi-er neq: “O yiang Satan, mới ốt coah clĩ cúq! Mới tở bữn chanchóm tễ ngê Yiang Sursĩ. Mới chanchóm tễ ngê cũai sâng.”

*Táq Nỏq Yoc Ê Tamoong Mantái
(Mathia 16:24-28; Luca 9:23-27)*

³⁴ Moâm ki Yê-su arô cũai chững cốp tốp rien tễ án toâq pở án. Án atỡng alóí neq: “Khân cũai aléq ma yoc ẽ puai cúq, cóq án táh chíq ngê án bữm. Cóq án ít dồỉ aluang sangcáng án bữm, cóp cóq án puai cúq. ³⁵ Cũai aléq ma pasếq rangứh án bữm, rangứh cũai ki lứq pứt. Ma cũai aléq ma chiũq pứt rangứh án cồ tian ngê cúq cốp parnai o tễ cúq, rangứh cũai ki lứq tở nai pứt. ³⁶ Khân cũai aléq bữn túc palễc crong cróu tâng dời nâi, ma án táh chíq rangứh án bữm, ntróu la kia yỗn án? ³⁷ Cốp acán ntróu cũai têq ralêq loah yỗn rangứh án? ³⁸ Cũai tâng dời nâi tở ểq sang Yiang Sursĩ, cốp alóí bữn lờih sa-ữi. Khân cũai aléq ma casiet táq tễ cúq cốp tễ parnai cúq yáng moat cũai tâng dời nâi, ki nỡ-ra cúq, Con Yiang Cốt Cũai, casiet táq cũai ki tê, tâng tangái cúq toâq loah parnoi cốp máh ranễng Yiang Sursĩ. Tangái ki cúq bữn chớch ang-ữr tễ Mpoaq cúq.”

9

¹ Yê-su atỡng alóí ễn neq: “Cúq atỡng anhia samoât lứq, bữn cũai ốt tayững ntốq nâi sanua, alóí tở yũah cuchĩt toau toâq alóí bữn hữm Yiang Sursĩ táq sốt cốp bữn chớch lứq.”

Roâp Yê-su Cốt Mpha Ĕn
(Mathia 17:1-13; Luca 9:28-36)

² Vót tapoât tangái, Yê-su dững Phi-er, Yacõ, cốp Yang chõn cốp án tâng cớh cuti. Ống alóí pỗn nác toâp ốt ngki. Chơ Yê-su samblót cốt roâp mpha ĩn yáng moat alóí pái nác ki.
³ Tampác Yê-su cốt cloc claq sarbal moat. Tở bữn noau têq táq aroâiq cloc ariang aroâiq ki.
⁴ Chơ alóí hữm Ê-li cốp Mũi-se ốt ngki tê. Alóí táq nững cốp Yê-su. ⁵ Phi-er atững Yê-su neq: “Thài ơi! Hái ốt nài la o lứq. Hếq ể táq pái lám nloâh, muoi lám yỗn thài, muoi lám yỗn Mũi-se, cốp muoi lám ĩn yỗn Ê-li.”

⁶ Ma Phi-er chuaq pai tở cốt ốc, yuaq alóí pái nác sâng ngcõh lứq. ⁷ Chơ ramúl sững clũom catáng alóí. Cốp bữn sượng sabau atững tể ramúl ki neq: “Nài la Con cứq, án ca cứq ayooq lứq. Ntrứu án atững, cóq anhia tamứng cốp trĩh án.”

⁸ Bo ki toâp alóí pái nác carlang nhêng chu nài chu ki, ma alóí tở bữn hữm noau noâng, ống manoaq Yê-su toâp ốt cốp alóí.

⁹ Bo alóí sững tể cớh, Yê-su patâp alóí neq: “Máh ranác anhia khoiq hữm ki, chõi atững yỗn cũai canõh dáng tể nhũang cứq, Con Yiang Cốt Cũai, cuchĩt, chơ tamoong loah tể ping.”

¹⁰ Ngkíq alóí trĩh parnai Yê-su patâp. Ma alóí manoaq blóh manoaq: “Ntrứu án pai, án tamoong loah tể ping?”

¹¹ Chơ alóí blóh Yê-su neq: “Nỏq cũai yỗng rit pai Ê-li cóq toâq nhũang Crĩt?”

12 Yê-su ta-ôi alói neq: “Ê-li lứq toâq nhũang đởq atức dũ ramứh yỗn cớt tamái loah. Khân ngkíq, nỏq parnai Yiang Sursĩ khoi q chĩc atởng tể Con Yiang Cớt Cũai cóq chũuq sa-ũri ramứh túh coat cóp noau tở bữn yám noap án? 13 Ma cứq atởng anhia, lứq Ê-li khoi q toâq chơ. Ma ranáq ntrớu noau yoc ẽ táq chỏq án, alói khoi q táq chơ; cớt rapĩei q parnai noau khoi q chĩc nhũang tể án.”

*Yiang Sâuq Payỏh Con Samiang
(Mathia 17:14-21; Luca 9:37-43a)*

14 Tữ Yê-su cóp pái náq ki chu loah pở yóu alói, alói hữm bữn cứng cũai toâq rôm mpễr tốp rien tể Yê-su. Cóp bữn cũai yỏng rit rasuon cóp alói. 15 Tữ cũai cứng ki hữm Yê-su, alói santar cóp lủh chu án, chơ cubán cusũan án. 16 Yê-su blóh alói neq: “Ntrớu anhia rasuon cóp tốp rien tể cứq?”

17 Bữn manoaq tể cũai cứng ki ta-ôi neq: “Thâi ơi! Cứq dửng con samiang cứq toâq pở thâi yuaq bữn yiang sâuq táq yỗn án cớt ngong. 18 Toâq yiang sâuq táq án, yiang ki atáih án tâng cutểq. Chơ rapooh loỏh tể bỗq án, án carũot canểng tabang, cóp tở chác án cớt coang nheq. Cứq khoi q canũri tốp rien tể thâi yỗn alói tuih aloỏh yiang sâuq ki, ma alói tuih tở riap.”

19 Yê-su blóh loah alói neq: “Ớ anhia ca ớt tâng dỡi nâi ơi! Lứq anhia tở bữn sa-âm. Noâng máh léq dũn cứq ớt cóp anhia? Noâng máh léq dũn cứq cóq chũuq cóp tanhĩr anhia tở bữn sa-âm. Âu, anhia dửng con ki toâq pở cứq.”

20 Chơ alóí dũng carnẽn samiang ki toâq pỡ Yê-su. Tũr yiang sâuq hũm Yê-su, án carvút tũng-tooc carnẽn ki. Chơ carnẽn ki dỏm tâng cutẽq, cớp palỏh tỗ tũng-tooc. Cớp bũn rapooh loỏh tẽ bỗq án hỡ. 21 Yê-su blỏh mpoaq carnẽn ki neq: “Maléq dũn án a-ĩ ngkíq?”

22 Mpoaq ki ta-õi: “Tẽ án cớt cớt. Sa-ũri trỗ yiang sâuq bỗh án tâng ũih cớp amót án tâng đỡq yỗn án cuchĩt. Ma khân têq thâi táq ntróu, sễq thâi ayooq táq cớp chuai hếq nũng.”

23 Yê-su blỏh loah án neq: “Nỏq mới pai, ‘Khân têq thâi táq ntróu?’ Khân cũai aléq lứq sa-âm, ramứh ntróu la têq nheq.”

24 Bo ki toâp mpoaq ki pai casang lứq neq: “Lứq cứq sa-âm! Sễq thâi chuai cứq táh chíq mút tỡ bũn sa-âm!”

25 Tũr Yê-su hũm clũng cũai toâq talỏm parnõi, án sươq yiang sâuq ki neq: “Yiang ca táq yỗn án cớt ngong cớp tũng, cứq ỏn mới loỏh tẽ tỗ án, cớp chõi mut noâng.”

26 Yiang sâuq ki hẽ casang lứq cớp carvút con ki tũng-tooc, chơ loỏh tẽ tỗ án. Carnẽn ki samoât riang cuchĩt, cớp sa-ũri náq pai: “Án khioq án cuchĩt chơ.”

27 Ma Yê-su tếc yỗn án yuor, chơ án yuor tayứng.

28 Tũr Yê-su cớp tỗp rien tẽ án mut tâng đớng, chơ tỗp rien tẽ án blỏh án neq: “Nỏq hếq tuih yiang sâuq ki tỡ riap?”

²⁹ Yê-su ta-õi alói neq: “Khân anhia tở bữn câu samoât samoi, lứq anhia tở riap tuih yiang sâuq ariang án ki.”

*Yê-su Atông Loah Tễ Án Cóq Chũuq Cuchit
(Mathia 17:22-23; Luca 9:43b-45)*

³⁰ Chơ alói loah tễ ntốq ki, cốp pỡq luat cruang Cali-lê. Ma Yê-su tở êq cũai canõh dáng chu léq án ẽ pỡq, yuaq án yoc atông ống tốp rien tễ án sâng. ³¹ Án atông alói neq: “Cheq noau ẽ chiau cứq, Con Yiang Cốt Cũai, pỡ aĩ cũai sốt. Alói ki lứq cachit cứq, ma vớt pái tangái cứq tamong loah.”

³² Tốp rien tễ Yê-su tở bữn sapúh santoiq ki, ma alói tở khón blóh án tễ ọc ki.

*Noau Toâr Clũi Nheq Tễ Canõh?
(Mathia 18:1-5; Luca 9:46-48)*

³³ Moâm ki alói toâq pỡ vil Cabê-na-um. Toâq alói mut tâng dống, Yê-su blóh alói neq: “Bo hái pỡq tâng rana, ntróu anhia ratoai?”

³⁴ Ma alói ki ravul sâng tở dáng ntróu ẽ ta-õi, yuaq bo alói pỡq tâng rana, alói rasuon noau tễ tốp alói toâr clũi nheq tễ canõh. ³⁵ Yê-su tacu cốp arô muoi chít la bar náq, chơ án atông alói neq: “Cũai aléq yoc ẽ táq sốt pỡng yóu, án cóq cõt pũn yóu, cốp táq ranáq yõn nheq tữh cũai canõh.”

³⁶ Moâm ki Yê-su tếc manoaq carnẽn, cốp yõn carnẽn ki tayúng mpúng dĩ tốp rien tễ án. Chơ án ca-ữ carnẽn ki, cốp atông alói neq: ³⁷ “Cũai aléq ma roap manoaq carnẽn máh nâi cõ án sa-âm cứq, cũai ki lứq roap cứq tê. Cốp cũai

aléq roap cúq, tở cõn cũai ki roap ống cúq, ma cũai ki roap dẻh án ca ón cúq toáq pở nài.”

Cũai Aléq Ca Tở Bữn Par-ũal, Samoát Án Chuai Hái Tẻ

(Luca 9:49-50; Mathia 10:42)

³⁸ Chơ Yang atởng Yẻ-su neq: “Thài ơi! Hẻq khoiẻ hữm manoaẻ cũai tuih aloỏh yiang sảuẻ, cớp án talẻq ramứh thài. Ma hẻq tở yỏn án táq noảng ranáẻ ngkẻẻ, yuaẻ án tở bữn tẻ tởp hái.”

³⁹ Ma Yẻ-su atởng loah án neq: “Anhia chỏi catảng án, yuaẻ tở bữn cũai alẻq ma tẻq táq ranáẻ salẻh nhỏ ramứh cúq, chơ mahỏi ẻn táq ntởng tở o tẻ cúq. ⁴⁰ Cũai alẻq ma tở bữn sanũi hái, nài la riang án chuai hái tẻ. ⁴¹ Cúq atởng anhia samoát lửẻ, khỏn cũai alẻq yỏn anhia nguaiẻ muoi cachoc đởẻ yuaẻ anhia bữn muoi mút cớp Crít, lửẻ án ki tở bữn óq cớng tẻ ranáẻ án táq.”

Yẻ-su Atởng Tẻ Noau Radửng Cũai Canỏh Táq Ranáẻ Sảuẻ

(Mathia 18:6-9; Luca 17:1-2)

⁴² “Khỏn cũai alẻq ma radửng manoaẻ carnẻn ca khoiẻ sa-ảm cúq, yỏn tở bữn sa-ảm noảng cúq, pẻiẻ lửẻ noau ảẻu tamáẻ toảr tẻng tacong án, cớp ảỏng ản tẻng đởẻ mút, nhửang ản ẻ radửng carnẻn ki calỏih táh cúq. ⁴³ Khỏn ảỉ anhia ma radửng anhia táq lỏih, cớq anhia cớh chẻq ảỉ anhia. Khaẻ anhia ỏt tamoong cớp bữn mút tẻng ntỏẻ Yiang Sursẻ sỏt, bữn ảỉ talút, salảng bữn đử bar coah ảỉ ma anhia mút

tâng pống sarloac. Tâng ntốq ki bữn ùih blữ
 tớ nai pát. ⁴⁴ Cóp bữn mpang rooc cha sâiq
 cũai, ma mpang ki tớ nai cuchĩt cóp ùih tớ nai
 pát.* ⁴⁵ Khãn ayững anhia ma radững anhia
 táq lôih, cóq anhia cớh chíq ayững anhia. Khaq
 anhia ốt tamoong cóp bữn mut tâng ntốq Yiang
 Sursĩ sớt bữn ayững talút, saláng bữn dũ bar
 coah ayững ma Yiang Sursĩ voang anhia tâng
 pống sarloac. ⁴⁶ Tâng ntốq ki bữn mpang rooc
 cha sâiq cũai, ma mpang ki tớ nai cuchĩt cóp
 ùih tớ nai pát. ⁴⁷ Khãn moat anhia ma radững
 anhia táq lôih, cóq anhia culáiq chíq moat anhia.
 Khaq anhia pút muoi ốc moat ma bữn mut tâng
 ntốq Yiang Sursĩ sớt, saláng bữn dũ bar ốc moat
 ma Yiang Sursĩ voang anhia tâng pống sarloac.
⁴⁸ Tâng ntốq ki bữn mpang rooc cha sâiq cũai,
 ma mpang ki tớ nai cuchĩt cóp ùih tớ nai pát.
⁴⁹ “Nữ-ra dũ náq cóq ramóh túh coat, nốq tềq
 alóit cõt báq bĩq. ⁵⁰ Boi la crong o. Ma khãn boi
 cõt ntiah, nốq ể táq yõn cõt báq loah? Cóq anhia
 cõt samoat báq pachóc; cóq ốt ratoi parnoi, cóp
 manoaq saryóq manoaq.”

10

Yê-su Atõng Tễ Cũai Táh Lacuoi
(Mathia 19:1-12; Luca 16:18)

¹ Vớt ki Yê-su loõh tễ ntốq ki, pốq chu cruang
 Yudê cóp cruang yáng tooh crõng Yôr-dan.
 Bữn cũai clững toáq pổ án, cóp án atõng alóit
 machóng án đốq táq tễ nling sĩa. ² Bữn cũai tễ

* **9:44** 9:44 Sa-ũĩ tâm saráq tiaq tớ bữn bữn rana 44 cóp 46.

tổp Pha-rasi toâq blóh chim Yê-su. Alóí blóh án neq: “Puai phếp rit hái, têq cũai samiang táh lacuoi, ma tở bữn?”

³ Yê-su blóh loah alóí neq: “Ntróu Mòi-se patâp anhia?”

⁴ Alóí ta-õỉ neq: “Mòi-se patâp hếq, khân cũai aléq yoc ẽ táh lacuoi, án cóq chĩc choâiq ratáh yỗn lacuoi án. Chơ têq án táh.”✧

⁵ Ma Yê-su atởng alóí neq: “Cỗ tian anhia bữn mút coang lứq, yuaq ngkíq Mòi-se chĩc ỏc patâp ki yỗn anhia. ⁶ Ma tễ dẫu lứq, bo Yiang Sursĩ tễng nheq dũ ramứh, án tễng cũai samiang cóp cũai mansẽm.✧ ⁷ Yuaq ngkíq cũai samiang cóq yoah tễ mpiq mpoaq, ma ỏt parnỏi cóp lacuoi án. ⁸ Chơ bar náq lacuoi cayac cởt máh muoi noaq sâng. Alóí tở bữn cởt noâng bar náq. Ma alóí cởt máh manoaq sâng. ⁹ Ngkíq, khân Yiang Sursĩ amóh yỗn alóí cởt lacuoi cayac, tở têq cũai aléq caryoah alóí yỗn ratáh.”

¹⁰ Toâq Yê-su cóp tổp rien tễ án mut loah tâng đống, tổp rien tễ án blóh loah Yê-su tễ ranáq ki.

¹¹ Yê-su ta-õỉ alóí neq: “Cũai aléq ma táh lacuoi, chơ ỉt lacuoi canỏh ẽn, cũai ki la samoât án cooc lacuoi noau. ¹² Cóp khân lacuoi ma táh cayac, chơ ỏt cóp cayac canỏh ẽn, cũai ki la samoât án cooc cayac noau tề.”

*Yê-su Câu Yỗn Carnẽn
(Mathia 19:13-15; Luca 18:15-17)*

✧ **10:4** 10:4 Patâp Loah 24:1-4 ✧ **10:6** 10:6 Saráq Tễ Dẫu 1:27; 5:2

13 Vót ki noau dững máh carnễn toâq pỡ Yê-su ểq án satoaq atĩ tâng carnễn ki. Ma tốp rien tể Yê-su sươq cũai dững carnễn ki. 14 Toâq Yê-su hữm ngkíq, án nhôp tốp rien tể án, cớp án atỡng alóí neq: “Anhia yỗn carnễn ki toâq pỡ cứq. Chỗi catáng alóí, yuaq tâng tốp Yiang Sursĩ sốt bữn ống cũai ca bữn mút pahồm samoât carnễn. 15 Cứq atỡng anhia samoât lứq, cũai aléq ma tở bữn pruam yỗn Yiang Sursĩ táq sốt samoât máh carnễn pruam, cũai ki tở têq mut tâng tốp Yiang Sursĩ sốt.”

16 Chơ Yê-su ca-ữ máh carnễn ki; án satoaq atĩ tâng alóí, cớp câu ốc bốn yỗn alóí hỡ.

Cũai Samiang Sốc

(Mathia 19:16-30; Luca 18:18-30)

17 Bo Yê-su ntôm pỡq tâng rana, bữn manoaq samiang lúh toâq pỡ án cớp sacốh racól yáng moat án. Samiang ki blóh Yê-su neq: “Thâi ơi! Thâi la o lứq. Ntróu cứq cóq táq, yỗn têq bữn tamoong mantái?”

18 Yê-su blóh loah án neq: “Nốq mới dờq cứq o? Ống Yiang Sursĩ toâp la o. 19 Mới dáng chơ ốc Yiang Sursĩ patâp: Chỗi cachĩt cũai; chỗi cooc lacuoi tở la cayac noau; chỗi tutuoíq; chỗi táq ntỡng lauq; chỗi lỏp; cớp yám noap mpiq mpoaq.”[☆]

20 Samiang ki ta-ỡi Yê-su neq: “Thâi ơi! Máh ramứh ki cứq khoíq táq tể bo cứq sanyờr.”

☆ 10:19 10:19 Lỏh Tể Ê-yip-tô 20:12-17; Patâp Loah 5:16-21

21 Yê-su nhêng chu án cốp sâng ayoog lứq án. Chơ Yê-su atỡng loah án neq: “Mới noâng khlâiq muoi ramứh. Cóg mới pớq chềq nheq máh mun mới bữn, chơ tampêq práq kia yỗn máh cũai cadĩt. Ngkíq mới bữn mun ngoaih tâng paloông. Chơ mới toâq puai cứq.”

22 Tữ cũai ki sâng Yê-su pai ngkíq, án ngúc moat múh cốp looh tể ki; án sâng ngua lứq, yuaq án la cũai sốc.

23 Chơ Yê-su carlang nhêng mpễr án, cốp án atỡng tốp rien tể án neq: “Coat lứq yỗn máh cũai sốc bữn mut tâng tốp Yiang Sursĩ sốt.”

24 Tữ Yê-su pai ngkíq, tốp rien tể án sâng dót lứq tâng mút. Ma Yê-su atỡng alóí neq: “Máh con cứq ơ! Cũai ca yoc ẽ mut tâng tốp Yiang Sursĩ sốt, ki coat lứq yỗn án. 25 Charán lac-da luaiq hống srúm, khể hỡn tể cũai sốc ma mut tâng tốp Yiang Sursĩ sốt.”

26 Tốp rien tể Yê-su sâng dót lứq, cốp alóí blóh loah Yê-su neq: “Khân ngkíq, noau têq mut tâng tốp Yiang Sursĩ sốt?”

27 Yê-su nhêng chu alóí cốp atỡng neq: “Máh cũai, tỡ têq táq bữm ranáq ki, ma Yiang Sursĩ têq táq nheq tữh ranáq.”

28 Phi-er atỡng Yê-su neq: “Nâi! Hếq khoiq táh dũ ramứh hếq bữn đốq puai thâi.”

29 Yê-su atỡng alóí neq: “Cứq atỡng anhia samoât lứq, khân bữn cũai aléq táh đống sũ, sễm ai sễm ỡi, mpiq mpoaq, con acái, tỡ la sarái cỗ tian án puai cứq cốp puai parnai o tể Yiang Sursĩ, 30 cũai ki lứq bữn loah tâng dời nâi muoi culám

trỗ hỡn tễ máh ramứh án khoiạ táh, ariang đống sũ, sễm ai sễm ỡi, mpiạ, con, cớp sarái. Án cớp ramóh túh coat hỡ. Ma chumát án bữn tamooing mantái. ³¹ Sa-ữi náq cõt toâr sanua, chumát alới cõt cacót ễn, cớp sa-ữi náq cacót sanua, chumát alới cõt toâr ễn.”

*Yê-su Atỡng Loah Tễ Án Chũuạ Cuchĩt
(Mathia 20:17-19; Luca 18:31-34)*

³² Yê-su cớp tộp rien tễ án pỡạ táng rana chõn chu vil Yaru-salem. Yê-su pỡạ nhũang alới. Máh tộp rien tễ Yê-su sâng dớt lứạ. Cớp máh cũai ca puai ntun alới, cũai ki sâng croỏạ. Yê-su đững muoi chít la bar náq loỏh tễ cũai ki cớp atỡng alới tễ máh ranáq cheạ ễ toạạ pỡ án. ³³ Án pai neạ: “Anhia tamứng! Hái cớp chõn pỡ vil Yaru-salem. Ớt ngki noau ễ chiau Con Yiang Cõt Cũai pỡ atĩ cũai sớt tộp tễng rit sang Yiang Sursĩ cớp cũai yớng rit. Alới ki anoat án cớq cuchĩt; chớ alới ễ chiau án pỡ cũai tỡ cỡn cũai I-sarel hỡ. ³⁴ Cũai ki ayê ra-ac án, cuchỏh táng án, proaih án, cớp cachĩt án. Ma vớt pái tangái, án yuor tamooing loah.”

*Yacỡ Cớp Yang Sễạ Muoi Ramứh Tễ Yê-su
(Mathia 20:20-28)*

³⁵ Vớt ki Yacỡ cớp Yang, la con samiang Sê-badê, toạạ pỡ Yê-su cớp sễạ tễ án neạ: “Thâi ỡi! Hễạ ễạ thâi táq máh ỏc hễạ sễạ tễ thâi.”

³⁶ Yê-su blớh alới neạ: “Ớc ntrớu anhia yoc cứạ táq yõn anhia?”

37 Alói ta-õi án: “Yõn hếq tacu manoaq coah atoam, manoaq coah avêr thài bo thài cõt sốt cốp bữn chóc ang-ũr.”

38 Yê-su ta-õi alói neq: “Anhia tở dáng dể ọc anhia sễq. Rơi tở anhia nguaiq muoi cachoc cốp cúq? Cốp rơi tở anhia roap batêm parnơi cốp cúq?”*

39 Alói ta-õi án: “Hếq rơi.”

Ma Yê-su atỡng loah alói neq: “Nỡ-ra anhia cóq nguaiq muoi cachoc cốp cúq, cốp anhia cóq roap muoi batêm cốp cúq tê. 40 Ma cúq tở têq yõn anhia tacu coah atoam cốp coah avêr cúq. Ốc ki ống Yiang Sursĩ sâng têq rươh.”

41 Tữ alói muoi chít náq canõh tâng tốp rien tễ Yê-su sâng ranáq ki, alói ùan lứq chóc Yacõ cốp Yang. 42 Chơ Yê-su arô nheq tốp ki toâq pữ án. Cốp án atỡng alói neq: “Anhia khoiq dáng chơ cũai sốt tâng dõi nâi yoc máh cũai proai cõt sũl alói, cốp alói padâm cũai proai túh coat lứq. 43 Ma anhia chõĩ táq samoât ngkíq. Cũai aléq yoc ẽ cõt toâr tâng tốp anhia, cóq án cõt ayững atĩ anhia. 44 Cốp cũai aléq yoc ẽ cõt toâr clũi nheq tễ canõh tâng tốp anhia, cóq án cõt sũl nheq tữh cũai. 45 Machóng ki tê, Con Yiang Cõt Cũai khoiq toâq pữ nâi tở ểq noau hâu án, ma án yoc ẽ hâu cũai canõh. Cốp án raléq rangứh án đợq cuchĩt tang yõn nheq tữh cũai.”

* **10:38** 10:38 Tữ Yê-su pai ‘nguaiq muoi cachoc’, án sacâm tễ ‘chũuq túh coat’. Cốp tữ án pai tễ ‘batêm’, án sacâm tễ án cóq ‘chũuq cuchĩt’.

*Cũai Sũt Bũn Ramóh Yê-su
(Mathia 20:29-34; Luca 18:35-43)*

⁴⁶ Vót ki Yê-su cốp tốp rien tể án toâq pỡ vil Yê-ri-cô. Tữ alóí loõh tể vil ki parnơi cốp cứng cũai canõh, alóí ramóh manoaq cũai sũt ốt susẽq kễng rana. Ramứh án la Bati-mê con samiang Ti-mê. ⁴⁷ Tữ án sâng noau pai Yê-su tể vil Na-sarết pỡq pha, chơ án sabau casang lứq neq: “Ồ Yê-su tể tống toiq puo Davĩt ơi! Sẽq Ncháu sarũiq táq cứq nừng!”

⁴⁸ Bũn sa-ũri náq cũai sươq án chõi tabốq, ma án sabau casang lứq ễn: “Ồ anhia tể tống toiq puo Davĩt ơi! Sẽq anhia sarũiq táq cứq nừng!”

⁴⁹ Yê-su tangút, chơ án ớn neq: “Arô cũai sũt ki toâq pỡ nãi.”

Chơ alóí arô cũai sũt ki, cốp alóí atõng án neq: “Chõi croõq ntróu. Mới yuor tayứng. Yê-su arô mới.”

⁵⁰ Ngkíq cũai ki carieiq táh au tuar án. Yóiq án yuor cốp toâq pỡ Yê-su. ⁵¹ Yê-su blóh án neq: “Ntróu mới yoc cứq táq yõn mới?”

Cũai sũt ki ta-õi: “Thâi ơi! Sẽq yõn moat cứq cõt blang!”

⁵² Yê-su atõng án neq: “Pỡq! Cỗ mới sa-âm, moat mới cõt blang.”

Bo ki toâp moat án cõt blang, chơ án puai Yê-su tể.

11

*Yê-su Mut Tânq Vil Yaru-salem
(Mathia 21:1-11; Luca 19:28-40; Yang 12:12-19)*

¹ Tũr alóí cheq ẽ toâq pữ vil Yaru-salem, alóí mbõiq toâq vil Bê-phayê cốp vil Bê-thani bân palic dũal O-li-vê. Tũr alóí toâq pữ ranoâq vil ki, Yê-su ớn bar náq tẽ tốp rien tẽ án neq: ² “Anhia mut tâng vil yáng moat anhia. Bo anhia toâq ramóh vil, anhia ramóh muoi lám aséh dẽn con ca tở bữn noau ớt yũah; noau chốq đốq án tâng lác ngki. Anhia leh, chơ tếc dũng pữ cúq. ³ Khân bữn noau blóh anhia neq: ‘Nốq anhia táq ngkíq?’ anhia ta-õĩ neq: ‘Ncháu hái yoc ẽ mian. Moâm án mian, chơ án dũng culáh loah yõn anhia.’ ”

⁴ Ngkíq alóí bar náq pữq, cốp alóí ramóh aséh con noau chốq đốq cheq ngoah toong đổng kẽng rana. Chơ alóí leh aséh ki. ⁵ Mách cũai ớt tayũng cheq ki blóh alóí neq: “Anhia leh táq ntróu aséh ki?”

⁶ Alóí bar náq ta-õĩ ãn Yê-su khoiq patâp; chơ máh cũai ki yõn alóí chu. ⁷ Vót alóí dũng achu aséh ki pữ Yê-su, alóí sũn tampác alóí tâng cloong aséh. Chơ Yê-su chõn ớt tâng cloong aséh ki. ⁸ Bữn sa-ũĩ náq cũai sũn tampác alóí tâng rana. Cũai canõh mut tâng arũih catráiq déh rambũ đốq sũn tâng rana. ⁹ Án ca pữq nhũang cốp án ca puai ntun, alóí triau casang lứq neq: “Ô-sana!* Sẽq Yiang Sursĩ yõn ốc bốn pữ cũai ca toâq nhơ ramúh Ncháu! ¹⁰ Lứq khẽn! Toâq chơ Sốt tẽ puo Davĩt, achúc achiac hái! Ô-sana! Lứq khẽn Yiang Sursĩ!”☆

* **11:9** 11:9 Santoiq ‘ô-sana’ parlong loah la ‘sa-õn lứq’ tở la ‘khẽn’. ☆ **11:10** 11:10 Ủat Khẽn 118:25-26

¹¹ Yê-su mut tâng vil Yaru-salem, chơ án mut tâng Dống Sang Toâr. Án carlang nhêng nheq máh ramúh mpễr ki; ma yuaq paloõng cheq sadâu, án loõh tễ ki cớp pớq chu vil Bê-thani parnơi cớp tốp muoi chít la bar náq rien tễ án.

¹² Poang tangái parnõ, bo alói pớq tâng rana loõh tễ vil Bê-thani, Yê-su sâng panhieih. ¹³ Án hữm noâng tễ yớng muoi nỡm tarúng bữn sala. Yê-su tarôq nhêng aluang ki bữn palâi ma tở bữn. Ma tữ án toâq, tở hữm palâi ntrứ, ống sala miat sâng, yuaq tở yũah ngư tarúng palâi.

¹⁴ Yê-su pai chóq nỡm tarúng ki neq: “Tễ nâi chumát tở bữn noau cha noâng palâi mới.”

Cớp tốp rien tễ Yê-su sâng án pai santoiq ki.

Yê-su Mut Tâng Dống Sang Toâr

(Mathia 21:12-17; Luca 19:45-48; Yang 2:13-22)

¹⁵ Vớt ki alói toâq pỡ vil Yaru-salem. Yê-su mut sĩa tâng Dống Sang Toâr. Chơ án ntôm tuih aloõh máh cũai chềq chõng tâng Dống Sang Toâr ki. Án cutól cachơng noau lêq práq cớp cachơng noau tacu chềq chóm tariap. ¹⁶ Cớp án tở yõn noau dững cớng luloah pớq chu táq rana tâng Dống Sang Toâr ki. ¹⁷ Chơ Yê-su pai chóq alói neq: “Nớq riang pai anhia tở bữn dáng Yiang Sursĩ khoiқ chíc neq:

‘Noau đớq đớng cứq la đớng yõn dũ tốp cũai toâq câu sễq.’[☆]

Ma anhia táq đớng cứq cõt ariang cựp yõn cũai savễng mut tooq.”

[☆] **11:17** 11:17 Ê-sai 56:7

18 Mách cũai sốt tốp tềng rit sang Yiang Sursĩ cớp máh cũai yống rit, alóí sâng Yê-su táq ngkíq, chơ alóí chi-chuaq ngê ẽ cachĩt án. Alóí ngcõh Yê-su, yuaq clứng lứq cũai sâng dót, cớp sâng p̄ieiq lứq máh santoiq Yê-su atõng. 19 Toâq tabũ, Yê-su cớp tốp rien tề án loõh tề vil ki.

Aluang Khoiq Roõh
(*Mathia 21:20-22*)

20 Poang tarurp, toâq alóí p̄õq pha nỡm aluang tarúng ki, alóí hữm aluang ki khoiq roõh toâq rêh. 21 Phi-er sanhữ loah máh Yê-su khoiq pai; chơ án atõng Yê-su neq: “Thâi ơi! Nhêng ki! Aluang thâi caturp tangái mahái khoiq roõh chơ.”

22 Yê-su patâp loah alóí neq: “Cóq anhia sa-âm Yiang Sursĩ. 23 Cứq atõng anhia samoât lứq, khân cũai aléq pai cóh nâi neq: ‘Mới ravih, chơ sapĩl chíq chu đõq mut,’ khân cũai nâi tở bữn mút catơn-tơn, ma án sa-âm lứq samoât tề ốc án pai lứq cõt, ranáq ki lứq cõt yõn án. 24 Ngkíq cứq atõng anhia, ntróu anhia sêq toâq santoiq câu, cóq anhia sa-âm lứq anhia khoiq bữn chơ ốc ki. Ngkíq chumát lứq anhia bữn.

25 “Toâq anhia tayúng câu, khân bữn cũai aléq khoiq táq lôih chóq anhia, cóq anhia táh lôih cũai ki. Ngkíq Mpoaq anhia tâng paloõng táh tê lôih anhia. 26 Khân anhia tở bữn táh lôih yóu, ngkíq Mpoaq anhia tâng paloõng tở bữn táh tê lôih anhia.”†

Noau Blóh Yê-su Tề Chórc Án
(*Mathia 21:23-27; Luca 20:1-8*)

† 11:26 11:26 Sa-ữi tâm saráq tiaq tở bữn bữn rana 26 nâi.

27 Vót ki alóí toâq loah pỡ vil Yaru-salem sĩa. Tữ Yê-su pỡq tâng clống Dống Sang Toâr, máh cũai sốt tốp têng rit sang Yiang Sursĩ, cớp máh cũai yống rit, cớp máh cũai sốt nheq sâu, alóí ki toâq pỡ án. 28 Cớp alóí blóh án neq: “Chóc tể léq thâi bữn đợq táq ranáq salễh nâi? Noau yỗn thâi bữn chóc kí?”

29 Yê-su ta-ỡi loah alóí neq: “Cứq ễ blóh anhia muoi ramứh tê. Khân anhia ta-ỡi cứq, ki cứq atỡng anhia noau yỗn cứq bữn chóc táq ranáq nâi. 30 Ranáq batểm Yang táq, tể léq ranáq ki toâq, tể Yiang Sursĩ tỡ la tể cũai? Anhia ta-ỡi cứq.”

31 Chơ alóí manoaq sarhống manoaq: “Khân hái ta-ỡi án pai: ‘Ranáq batểm nâi toâq tể Yiang Sursĩ,’ ngkếq án blóh loah hái: ‘Khân ngkíq, nốq anhia tỡ bữn sa-âm Yang?’ 32 Ma khân hái ta-ỡi án: ‘Ranáq batểm nâi chống toâq tể cũai sâng,’ ki hái ngcõh cũai proai, yuaq alóí sa-âm lứq Yang la cũai tang bỗq Yiang Sursĩ.”

33 Ngkíq alóí ta-ỡi Yê-su neq: “Hếq tỡ dáng.”

Yê-su ta-ỡi loah alóí neq: “Chơ! Cứq tỡ bữn atỡng tê anhia noau yỗn cứq bữn chóc táq máh ranáq nâi.”

12

*Parnai Sacâm Tể Manoaq Chóh Palâi Nho
Tâng Nưong*

(Mathia 21:33-46; Luca 20:9-19)

1 Yê-su tabốq atỡng alóí toâq parnai sacâm neq: “Bữn manoaq samiang chóh voar nho tâng

nương. Án táq cantruang mpêr nương. Án píq prúng, cốp chíp tamáu ien ẽ pát đõq nho tâng ki. Án táq sũ hữ đõq kĩaq nương ki. Moâm ki án chiau yõn cũai táq đõ nương ki yõn án. Alói pruam ndõm pruam mpêq máh palâi. Chơ án põq cruang canõh. ²Toâq catữ palâi chĩn, ncháu nâi ớn sũl án toâq pữ alói ca táq đõ nương án. Án ớn sũl ki ít pún án tẽ cũai táq đõ nương. ³Tữ cũai sũl toâq, máh cũai táq đõ nương cốp án, toân án, cốp tuih aloõh án. Alói yõn án chu miat sâng. ⁴Chơ ncháu ki ớn cũai sũl canõh ẽn põq pữ ki. Ma alói toân án tâng plõ, cốp táq yõn án cõt lo-lo miat sâng. ⁵Ncháu ki ớn cũai sũl canõh ẽn toâq pữ ki. Ma alói cachĩt án. Alói táq samoât tẽ nhũang sĩa chóq cứng cũai; án ca alói toân, án ca alói cachĩt táh. ⁶Ncháu nâi noâng bữn muoi lám con samiang ca án ayoõq lữq. Toâq parsõt tháng, án ớn con án ẽn põq. Án chanchóm neq: ‘Alói lữq yám noap con cứq.’ ⁷Ma máh cũai táq đõ nương ki, manoaq sarhõng manoaq neq: ‘Nâi la con tổng ncháu. Hâi! Hái cachĩt chíq án. Ngkíq nheq mun án cõt khong hái ẽn.’ ⁸Chơ alói cốp cốp cachĩt án. Alói lampõng án aloõh yáng tiah nương. ⁹Nõq toâp ncháu nương ẽ táq? Lữq án toâq cachĩt nheq máh cũai táq đõ nương án, cốp án chiau yõn cũai canõh ẽn táq đõ nương ki. ¹⁰Nõq riang pai anhia tở nai doc tâng tâm saráq Yiang Sursĩ án pai neq:
‘Cốc tamáu cũai táq đõng khoiq táh,
tamáu ki noau hữm o hỡn tẽ tamáu canõh.
Chơ noau ít cốp chíp bân soq đõng.’

11 Ranáq nâi khoiḡ Ncháu hái toâp táq,
 la ranáq salêh lứḡ án táq yáng moat hái.' **✧
 12 Máh cũai sốt ca sâng Yê-su pai ngkíḡ, alóí
 chuaḡ ngê ẽ cốp án, cỗ alóí dáng án atōng parnai
 sacâm nâi pai chu alóí. Ma alóí ngcõh cũai proai.
 Ngkíḡ alóí loõh tẽ án, cốp pỡḡ chu ntốḡ canõh
 ẽn.

Yê-su Atōng Tẽ Práḡ Thẽḡ
(Mathia 22:15-22; Luca 20:20-26)

13 Ntun ki noau ón cũai tẽ tốp Pha-rasi cốp tẽ
 tốp Hê-rôt ẽn toáḡ pỡ Yê-su, yõn alóí chi-chuaḡ
 óc lòih Yê-su táq ntōng. 14 Tốp alóí toáḡ pỡ Yê-
 su cốp atōng án neḡ: “Thâi ơi! Hếḡ dáng chơ
 thâi lứḡ cũai tanoang. Yáng moat thâi nheḡ tữh
 cũai la lĩ-ralĩ nheḡ. Yuaḡ ngkíḡ, thâi tỡ bữn yám
 noap óng cũai bữn chóc sâng. Thâi atōng ngê
 Yiang Sursĩ p̄ieḡ lứḡ. Puai phếp rit hái p̄ieḡ ma
 tỡ bữn hái cóḡ muap práḡ thẽḡ pỡ puo Rô-ma?”
 15 Ma Yê-su dáng alóí táq nan sâng. Chơ án
 blóh loah alóí neḡ: “Nốḡ anhia chuaḡ ralíh chóc
 cứḡ? Anhia dững pỡ cứḡ muoi óc práḡ, yõn cứḡ
 nhêng.”

16 Ngkíḡ alóí dững yõn án muoi óc práḡ. Chơ
 án blóh loah alóí neḡ: “Roâp anâi cốp chĩr anâi
 la samoât noau?”

Alóí ta-õĩ án neḡ: “Puo Rô-ma.”

17 Chơ Yê-su atōng alóí neḡ: “Crong puo Rô-
 ma, cóḡ anhia culáh loah yõn puo Rô-ma; cốp

* **12:11** 12:11 Puai tẽ ranáq alóí ki táq, tamáu aléḡ noau chĩp
 tâng soḡ, tamáu ki táng yõn đống cõt khâm. Tamáu ki Yê-su
 sacâm tẽ tỡ án toâp. ✧ **12:11** 12:11 Ủat Khẽn 118:22-23

ơng Yiang Sursĩ cóq anhia culáh loah yõn Yiang Sursĩ.”

Ma alóí sâng dót lứq Yê-su atõng ngkíq.

*Tõp Sa-dusê Blóh Yê-su Tẽ Ốc Tamoong Loah
(Mathia 22:23-33; Luca 20:27-40)*

¹⁸ Bữn cũai tẽ tốp Sa-dusê toâq pỡ Yê-su. Tốp Sa-dusê pai cũai khoiq cuchĩt tỡ têq tamoong loah. ¹⁹ Alóí atõng án neq: “Thâi ơi! Mũi-se khoiq chĩc yõn hái dáng, khân manoaq samiang cuchĩt, ma lacuoi án noâng tamoong, cóp alóí tỡ yũah bữn con, ngkíq manoaq tẽ sễm ai án cóq siem lacuoi án, đốq patõng loah án ca khoiq cuchĩt. ✧ ²⁰ Dỡi mbốq bữn tapul náq sễm ai. Ai clúng khoiq ít lacuoi, chơ án cuchĩt, ma tỡ yũah bữn con. ²¹ Ngkíq a-ễm ndĩ ễn siem lacuoi ai. Ma tỡ yũah bữn con, khoiq án cuchĩt tê. Chơ a-ễm ralỏh la cõt machóng máh mu ai án tê. ²² Tapul náq ễm ai ít mansễm ki táq lacuoi. Aléq la cuchĩt ma tỡ bữn bữn con; cóp ntun thág mansễm ki cuchĩt tê. ²³ Tữ máh cũai cuchĩt bữn tamoong loah, mansễm ki cõt lacuoi noau? Yuaq tapul náq ễm ai ndỡm nheq mansễm ki.”

²⁴ Yê-su atõng loah alóí neq: “Anhia táq ntõng tỡ pẽiq, yuaq anhia tỡ bữn dáng raloaih tẽ parnai Yiang Sursĩ ca noau khoiq chĩc tẽ mbốq; cóp anhia tỡ dáng tẽ chóc sốt toâr Yiang Sursĩ. ²⁵ Tữ alóí ca khoiq cuchĩt bữn tamoong loah, ki alóí tỡ bữn cõt noâng lacuoi cayac. Ma alóí ốt

✧ **12:19** 12:19 Patâp Loah 25:5

tâng paloŏng machóng tồp ranẽng Yiang Sursĩ tê.

²⁶ “Ma tẽ ranáq cũai cuchĩt, chơ tamoong loah, nốq riang pai anhia tở nai doc tâng tâm saráq Mội-se chĩc tẽ rambũ blữ ùih ma tở bữn cat. Pở ntốq ki Yiang Sursĩ atống Mội-se neq:

‘Cứq la Yiang Sursĩ A-praham sang, I-sac sang, cớp Yacốp sang.’[☆]

²⁷ Hái dáng cũai cuchĩt tở têq sang Yiang Sursĩ. Ống cũai tamoong sâng têq sang án. Lứq anhia tở bữn dáng thánq.”

*Ốc Yiang Sursĩ Patáp Toâr Clữi Nheq Tẽ Canốh
(Mathia 22:34-40; Luca 10:25-28)*

²⁸ Bữn manoaq tẽ tồp cũai yống rit toâq pở ki cớp sâng alóı raloai ngkíq. Cớp án sâng Yê-su ta-ỡi o lứq, ngkíq án blóh Yê-su neq: “Tẽ máh ốc Yiang Sursĩ patáp, ốc aléq toâr clữi nheq tẽ ốc canốh?”

²⁹ Yê-su ta-ỡi loah án neq: “Nâi la ốc toâr clữi nheq tẽ ốc canốh Yiang Sursĩ patáp: ‘Tồp I-sarel ơı! Anhia tamứng! Yiang Sursĩ, Ncháu hái, ống manoaq án toâp. ³⁰ Cớq anhia ayooq Yiang Sursĩ, Ncháu anhia, nheq tẽ mút pahồm anhia, nheq tẽ sarnóm anhia, cớp nheq tẽ rangứh rahỡ anhia.’[☆]

³¹ Cớp ốc patáp bar ca toâr clữi nheq tẽ canốh la neq: ‘Cớq anhia ayooq yóu samoât anhia ayooq tồ anhia bữm.’[☆]

Ốc patáp canốh tở bữn clữi tẽ bar ốc patáp nâi.”

[☆] **12:26** 12:26 Loốh Tẽ Ê-yip-tô 3:6 [☆] **12:30** 12:30 Patáp Loah 6:4-5 [☆] **12:31** 12:31 Lê-vi 19:18

³² Án ca tẽ tốp yống rit atõng loah Yê-su neq: “Thâi oi! Lứq tanoang thâi atõng. Thâi atõng p̄ieiq lứq, Yiang Sursĩ la manoaq án toáp. Vót tẽ Yiang Sursĩ la tở bữn yiang aléq ma sôt. ³³ Khân hái ayooq Yiang Sursĩ neq tẽ mút pahõm, neq tẽ sarnóm, cốp neq tẽ rangúh rahõ, cốp hái ayooq yóu machóng hái ayooq tở hái bữm, ranáq nâi o hõn tẽ noau bõh charán chiau sang, tở la chiau sang máh cróng canõh yõn Yiang Sursĩ.”

³⁴ Yê-su sâng án ta-õi rangoaiq lứq, chơ Yê-su atõng loah án neq: “Khoiq cheq lứq chơ mới bữn mut tâng tốp Yiang Sursĩ sôt.”

Vót ki tở bữn noau khón blóh nõang Yê-su.

Santoiq Blóh Tẽ Manoaq Crĩt
(*Mathia 22:41-46; Luca 20:41-44*)

³⁵ Bo Yê-su atõng tâng Dõng Sang Toâr, án blóh neq: “Nốq cũai yống rit pai Crĩt toâq tẽ tống toiq Davĩt? ³⁶ Ma cutõ Davĩt toáp pai nhơ Raviei Yiang Sursĩ ớn án pai neq:

‘Yiang Sursĩ atõng chóq Ncháu cứq neq:

“Mới tacu coah atoam cứq†

yõn toau toâq tangái léq cứq chiau alóí ca ẽ
cachĩt mới,
õt pũn talang ayũng mới, cốp cõt sũl
mới.” ’☆

³⁷ Cutõ Davĩt toáp đõq Crĩt la Ncháu. Ki nốq tẽq Davĩt đõq cũai tẽ tống toiq án bữm la Ncháu?”

† **12:36** 12:36 Puaí phẽp rit cũai I-sarel, khân cũai aléq ma alóí yoc ẽ yám noap lứq samoât, ngkíq alóí yõn cũai ki õt coah atoam alóí. ☆ **12:36** 12:36 Ủat Khẽn 110:1

Cũai cứng ki sâng bũi o lứq tễ Yê-su atỡng ngkíq.

Yê-su Sươq Cũai Chỗi Táq Machóng Cũai Yống Rit
(*Mathia 23:1-36; Luca 20:45-47*)

³⁸ Bo Yê-su atỡng, án pai neq hỡ: “Anhia chỗi táq machóng cũai yống rit. Alói ểq lứq sớp au tuar, cớp ểq lứq cũai canõh tabõp o alói bo alói ốt cớp cũai cứng. ³⁹ Alói yoc ể bữn cachơng tacu o clữi nheq tễ canõh tâng đống sang, cớp alói yoc ể tacu coah pỡng toâq noau mới alói toâq cha. ⁴⁰ Alói lỏp máh đống cán cumai; chơ alói câu cuti ểq noau khễn alói la lứq tanoang o. Ma chumát tột alói nâng hỡn tễ cũai canõh.”

Manoaq Cán Cumai Chóq Práq Sang
(*Luca 21:1-4*)

⁴¹ Vót ki Yê-su tacu cheq ntốq noau đốq chóq práq sang. Án nhêng chu máh cũai chóq práq sang tâng ntốq ki. Cứng cũai sớc chóq práq sang sa-ữi lứq. ⁴² Ma bữn manoaq cán cumai cadĩt lứq toâq pỡ ki. Án chóq bar ốc práq, práq ki bữn kia bĩq lứq. ⁴³ Chơ Yê-su arô tốp rien tễ án toâq pỡ án, cớp án atỡng alói neq: “Cứq atỡng anhia samoât lứq, cán cumai cadĩt nãi, án chóq práq sang sa-ữi hỡn tễ nheq máh cũai canõh. ⁴⁴ Nheq tữh cũai ki chóq práq clữi tễ alói tác cha; ma cán cumai nãi ốq lứq, máh léq án bữn án chóq nheq máh ki.”

13

*Yê-su Atông Tễ Ớc Túh Coat Cóp Tangái Án
Toâq Loah Pở Cutểq Nài
(Mathia 10:16-25; 24:1-44; Luca 21:5-33)*

¹ Tữ Yê-su loỏh tễ Dổng Sang Toâr, bữn manoaq tễ tốp rien tễ án atông án neq: “Thài ơi! Nhêng pở ki! Tamáu ki cóp Dổng Sang Toâr ki o pha moâm!”

² Ma Yê-su blớh loah án: “Mới hữm dổng toâr nài tở? Chumat tamáu noau táq dổng toâr nài tở bữn ratót noâng parnơi. Án ratáh neq.”

³ Vớt ki Yê-su tacu ớt tâng dũal O-li-vê choâng Dổng Sang Toâr. Phi-er, Yacỗ, Yang, cóp Anrê, ống alới pỏn náq toâp ớt cóp Yê-su. ⁴ Alới blớh án: “Sễq thài atông hếq, noâng dũn maléq ranáq nài toâq? Tểc ntrứu sapáh nhũang ranáq nài ể toâq?”

⁵ Yê-su atông alới neq: “Cóq anhia ớt khểuq. Chỗi yỏn noau phểq anhia. ⁶ Chumat bữn sa-ữi náq toâq cleũ ramứh cứq. Alới pai neq: ‘Cutổ cứq toâp la Crít!’ Cóp alới phểq cứng lứq cũai.

⁷ “Tữ anhia sâng parhan noau rachíl cheq-cheq yong-yong, anhia chỗi croỏq ntrứu. Ranáq nài cóq toâq nhũang voai. Ma tở yũah toâq tangái parsốt thág. ⁸ Lứq bữn tốp nài rachíl ratáq cóp tốp ki; cruang nài rachíl ratáq cóp cruang ki. Bữn sa-ữi nốq cutểq rachâu cóp cacurt. Cóp bữn sa-ữi nốq ớq sana cha. Máh ramứh nài mbởiq tễ dẫu sâng. Ma noâng bữn sa-ữi ramứh túh coat ển.

9 “Yuaq ngkíq cóq anhia nhêng o. Lúq noau cõp anhia cóp dững anhia toâq pở cũai sớt. Noau toân anhia tâng đống sang tốp I-sarel. Cóq anhia tayúng yáng moat cũai sớt cóp cũai puo hữ cõ tian anhia puai cứq, đõq anhia atõng yõn alóí dáng tê tễ ngê cứq. 10 Tốp puai cứq cóq atõng parnai o tễ Yiang Sursĩ nhũang voai, yõn nheq tữh cũai dáng. 11 Tữ noau cõp ẽ dững sữq anhia, anhia chõĩ croõq. Anhia chõĩ cõng nhũang ntróu anhia yoc ẽ pai. Ma anhia pai puai santoiq Yiang Sursĩ atõng yõn anhia pai bo ki. Yuaq santoiq ki la tở cởn tễ anhia, ma santoiq Raviei Yiang Sursĩ atõng. 12 Bo dõĩ ki sễm ai ẽ cõp ratuaq sễm ai, cóp chiau yõn noau cachĩt; mpoaq chiau con án yõn noau cachĩt. Con acái ra-ũan chóq mpiq mpoaq, cóp chiau mpiq mpoaq yõn noau cachĩt alóí. 13 Nheq tữh cũai lúq kêt anhia cõ tian anhia puai ngê cứq. Ma cũai aléq rơi tanhĩr toau sớt anhúq án, Yiang Sursĩ lúq chuai amoong cũai ki.

14 “Nữ-ra anhia bữn hữm noau đõq tâng Đống Sang Toâr cõng nhợp cóp ranáq lóih ca Yiang Sursĩ tở ẽq hữm. (Cũai aléq doc santoiq nâi cóq chanchóm yõn samoat tễ ốc nâi.) Tangái ki máh cũai tâng cruang Yudê cóq lúh chõn ớt tâng cóh ễn. 15 Án ca ớt nhựp curũm đống, chõĩ chõn ỉt nõng cõng tễ đống. 16 Án ca ớt pở sarái, chõĩ chu ỉt nõng tampác tễ đống. 17 Tâng tangái ki, tởiq bap lúq alóí ca ớt mumiaq cóp apu con. 18 Cóq anhia câu sễq chõĩ yõn máh ranáq ki toâq

tâng casâi sangêť. ¹⁹ Yuaq tâng tangái ki bữn túh coat clữi tể tangái dâu Yiang Sursĩ tểng paloõng cutêq yõn toau toâq sanua. Cóp ntun ên tở bữn túh coat noâng riang tangái ki. ²⁰ Khân Yiang Sursĩ tở bữn arũiq loah máh tangái ki, lứq tở bữn noau têq tamoong noâng. Ma cõ án yoc ẽ chuai máh cũai án ruroh, ngkíq án arũiq loah máh tangái ki.

²¹ “Khân noau atõng anhia neq: ‘Nâi! Án nâi la lứq Crĩt!’ tở la ‘Tíh! Án ca õt pở ki la lứq Crĩt!’, anhia chõi noap santoiq ki. ²² Yuaq nữ pra bữn cũai tở cõn lứq Crĩt, cóp tở cõn lứq cũai tang bõq Yiang Sursĩ toâq pở anhia. Alói táq tểc salêh đõq thũ phếq anhia. Khân têq, alói yoc ẽ rakiaug máh cũai ca Yiang Sursĩ khoiq ruroh yõn táq ranáq sâuq ariang alói tê. ²³ Ngkíq cóq anhia õt khêuq. Máh ramứh nâi cứq atõng yõn anhia dáng nhũang. ²⁴ Ma vót tê tangái túh coat lứq, moat mandang tở bữn cla q noâng, cóp rliang casâi tở bữn tráh noâng. ²⁵ Mantõr satooh tể paloõng, cóp máh ramứh bữn chóc tâng paloõng, Yiang Sursĩ táq yõn rachâu nheq. ²⁶ Moâm ki, noau lứq hữm cứq, Con Yiang Cõt Cũai, toâq mpúng dĩ ramứl, bữn chóc sớt toâr lứq cóp roáp ang-ũr.✠ ²⁷ Toâq ki cứq ớn ranềng Yiang Sursĩ tể paloõng parõm dĩ náq cũai ca cứq khoiq ruroh tể dĩ pứp paloõng cutrúq, cóp cu angia pữn paloõng cutrúq nâi.”

²⁸ Yê-su atõng ên neq: “Cóq anhia tamứng ọc

✠ 13:26 13:26 Daniel 7:13

cứq sacâm tễ aluang tarúng. Bo abễng aluang ki noâng nhuam, ản báiq lacứp sala nhuam. Ngkíq anhia dáng khoiq cheq ễ toâq casâi phũac. ²⁹ Machớng ki tê, khân anhia hữm máh ranáq nâi toâq, anhia lứq dáng Con Yiang Cốt Cũai cheq ễ toâq chơ. Ắn khoiq tamóc ngoah toong. ³⁰ Cứq atỡng anhia samoât lứq, nheq tửh cũai tâng dõi nâi tỡ bữn pút nhũang nheq ranáq nâi toâq. ³¹ Chumát, paloõng cớp cutễq cốt pút nheq, ma santoiq cứq tỡ nai pút.

³² “Tỡ bữn noau dáng tangái ntrớu tỡ la bo léq ranáq ki toâq. Máh ranễng Yiang Sursĩ tâng paloõng cớp Con Yiang Sursĩ la tỡ bữn dáng tê tangái ki. Ổng manoaq Mpoaq cứq toâp dáng tangái ki.

³³ “Ngkíq cóq anhia ốt acoan cớp trồỉ níc, yuaq anhia tỡ bữn dáng bo léq ranáq nâi toâq. ³⁴ Ranáq nâi la machớng manoaq samiang pỡq tamoi chu cruang yớng. Tỡ ản loõh tễ dống, ản chiau máh ranáq tâng dống ản yỗn cũai táq ranáq ản. Cớp ản patâp cũai kĩaq toong cóq ốt trồỉ níc. ³⁵ Ngkíq cóq anhia trồỉ níc, yuaq anhia tỡ dáng bo léq ncháu dống chu. P̄ieiq ản chu sadâu tỡ la muoi mpút. P̄ieiq ản chu ntruoi tacar tỡ la tarựp cớng bữn. ³⁶ Cóq anhia acoan nhềng níc. Ngcõh lớ sarblớỉ ản chu, chơ ản ramóh anhia bếq. ³⁷ Máh santoiq cứq atỡng anhia sanua, cứq atỡng yỗn nheq tửh cũai dáng tê: Cóq anhia acoan nhềng níc!”

Cũai Sốt Sarhống Ê Cachĩt Yê-su
(*Mathia 26:1-5; Luca 22:1-2; Yang 11:45-53*)

¹ Noâng bar tangái ễn tốp I-sarel ễ cha bũi sanhữ Tangái Loõh.* Cóp alóit Táq Rit Cha Bểng Mi Ốq Crong Pluoih. Ngkíq cũai sốt tốp tềng rit sang Yiang Sursĩ cóp cũai yống rit, alóit chuaq ngê yoc ễ cóp Yê-su cóp cachĩt án, ma alóit tở ễq cũai canõh dáng. ² Alóit sarhống neq: “Hái tở tềq táq ngkíq tâng tangái cha bũi. Ngcõh cũai clừng ki táq choac tâng vil.”

Manoaq Mansẽm Tõh Dỡq Phuom Tâng Yê-su
(*Mathia 26:6-13; Yang 12:1-8*)

³ Bo Yê-su ốt tâng vil Bê-thani, án ốt tâng đồng Si-môn, la cũai ca hõi rái bữn a-ĩ tut. Bo Yê-su ốt chi-cha, bữn manoaq mansẽm toâq cóp dững muoi bễ dỡq phuom. Bễ ki noau táq toâq tamáu a-labat. Dỡq phuom tâng bễ ki moat lứq, noau dỡq nar. Mansẽm ki pềng bễ, chơ án tởh dỡq phuom tâng plỡ Yê-su. ⁴ Bữn cũai ốt ngki tở bữn bũi án táq ngkíq, cóp alóit pai neq: “Nỡq án palõ dỡq phuom nâi ngkíq? ⁵ Khân chềq dỡq phuom nâi, bữn práq clữi tễ cóng noau tuthẽ pái culám tangái. Chơ tềq ỉt práq ki chuai máh cũai cadĩt.” Ngkíq alóit nhôp mansẽm ki.

⁶ Ma Yê-su atõng alóit neq: “Dỡq tam án. Anhia nhôp táq ntrứu mansẽm ki? Nỡq anhia táq yõn án ngua? Án khioq táq ranáq o yõn cứq. ⁷ Cũai cadĩt ốt níc cóp anhia. Maléq anhia yoc ễ chuai,

* **14:1** 14:1 Tangái ki alóit sanhữ tangái Yiang Sursĩ chuai yõn alóit loõh tễ cruang Ê-yip-tô tễ mbốq.

ki têq anhia chuai. Ma tở cứq tở bữn ớt mantái níc cớp anhia. ⁸ Ranáq ntróu têq mansẽm nâi táq, án khoiá táq chơ. Án khoiá tởh đợq phuom tâng tở cứq, đợq thữan nhũang noau túp cứq tâng ping. ⁹ Cứq atởng anhia samoát lứq, tâng dũ ntốq chũop cớc cutẽq nâi, toâq noau atởng parnai o tẽ Yiang Sursĩ, lứq noau atởng dẽh ranáq mansẽm nâi táq hỡ, đợq cũai sanhữ loah án.”

*Yuda Pruam Chẽq Chíq Yê-su
(Mathia 26:14-16; Luca 22:3-6)*

¹⁰ Vớt ki Yuda I-cari-ôt, án la tẽ tốp muoi chít la bar náq, án toâq pỡ máh cũai sớt tốp tẽng rit sang Yiang Sursĩ, cớ yoc ẽ chẽq Yê-su yõn alớ. ¹¹ Tữ alớ sâng ngkíq, alớ ỡn lứq, cớp alớ ữq chang práq yõn Yuda. Chơ Yuda chi-chuaq ngê đợq chẽq Yê-su.

*Yê-su Cha Parnơi Cớp Tốp Rien Tẽ Án
(Mathia 26:17-25; Luca 22:7-14, 21-23; Yang 13:21-30)*

¹² Tâng tangái cũai I-sarel Táq Rit Cha Bẽng Mi Ớq Cờng Pluoih cớp kiac charán cữu đợq sanhữ Tangái Loõh, tangái ki tốp rien tẽ Yê-su blóh án neq: “Ntốq léq thâi yoc hẽq pỡq thữan yõn thâi cha pêl bũ?”

¹³ Yê-su ớn bar náq tốp rien tẽ án neq: “Anhia mut tâng vil. Chơ anhia bữn ramóh manoaq samiang ayẽq aluoi đợq. Anhia puai ntun clĩ án. ¹⁴ Khân án mut đống léq, anhia atởng ncháu đống ki neq: ‘Thâi blóh neq: Nlẻq clống tamoi

yõn cúq cớp tồp rien tễ cúq cha pêl bũi Tangái Loõh?’¹⁵ Án lứq sadoi muoi clống toâr tâng tran pớng yõn anhia. Tâng clống ki bữn dũ ramứh cớng tadõng. Anhia thữan yõn hái cha pớ ki.”

¹⁶ Alói bar náq loõh tễ ki cớp mut tâng vil. Alói ramóh samoât Yê-su khoiạ atõng alói. Chơ alói tễng pêl cha bũi ngki.

¹⁷ Toâq nhứm-nhứm Yê-su cớp tồp muoi chít la bar náq toâq pớ ki. ¹⁸ Bo alói tacu cha, Yê-su atõng alói neq: “Cúq atõng anhia samoât lứq, bữn manoaq tễ anhia ca cha parnoi cớp cúq sanua, ngkếq án chềq cúq.”

¹⁹ Alói ki sâng ngua lứq, cớp chữ manoaq alói blớh Yê-su neq: “Cúq ma tở bữn, thài?”

²⁰ Yê-su ta-õi alói neq: “Cũai nâi la manoaq tễ muoi chít la bar náq anhia; án tốq bễng muoi tangan cớp cúq tê. ²¹ Con Yiang Cốt Cũai cóq cuchít ariang tâm saráq Yiang Sursĩ khoiạ atõng chơ tễ án. Ma cũai ca chềq Con Yiang Cốt Cũai, bap lứq toâq pớ án. Pěiạ lứq la mpiạ án chõi canõt.”

*Alói Cha Nguaiạ Sanhữ Tồ Cớp Aham Yê-su
(Mathia 26:26-30; Luca 22:15-20; Cờn-ntô Muoi
11:23-25)*

²² Bo alói cha, Yê-su ỉt bễng. Án sa-õn Yiang Sursĩ, chơ án pĩh bễng cớp avoi yõn tồp rien tễ án cha. Án atõng alói neq: “Anhia roap. Nâi la tồ cúq.”

²³ Vót ki án ỉt cachoc ẽn. Moâm án sa-õn Yiang Sursĩ, án avoi yõn tồp rien tễ án nguaiạ. Nheq náq alói nguaiạ. ²⁴ Cớp Yê-su atõng alói neq:

“Nâi la aham cứq. Aham nâi loõh táq tếc Yiang Sursĩ par-ữq parnai tamái yõn nheq tữh cũai.
 25 Cứq atõng anhia samoât lứq, cứq tở nai nguaiq noâng đõq palâi nho toau toâq tangái cứq nguaiq đõq nho tamái tâng ntốq Yiang Sursĩ sốt.”

Yê-su Atõng Nhũang Tễ Ranáq Phi-er Táq
 (Mathia 26:31-35; Luca 22:31-34; Yang 13:36-38)

26 Moâm alóí ủaat cansái khẽn, chơ alóí loõh tễ ki chõn tâng dũal O-li-vê. 27 Yê-su atõng alóí neq: “Ngkếq nheq tữh anhia lúh táh cứq. Tâm saráq Yiang Sursĩ khoiq atõng chơ neq:

‘Cứq yõn noau cachĩt chíq cũai mantán cữu,
 chơ tốp cữu cứq cõt pláh chap nheq.’[☆]

28 Ma toâq cứq tamoong loah, cứq pờq nhũang anhia pờ cruang Cali-lê.”

29 Phi-er atõng Yê-su neq: “Khân nheq tữh cũai lúh táh thâi, cứq lứq tở bữn táh thâi.”

30 Yê-su atõng loah Phi-er neq: “Cứq atõng mới lứq samoât, tâng sadâu nâi toâp nhũang ntroui tacar bar trỗ, mới lứq calõih cứq pái trỗ.”

31 Ma Phi-er ta-õi neq: “Khân noau cachĩt cứq cốp thâi la thõi. Cứq tở bữn calõih thâi mỗ!”

Cốp nheq tữh tốp ki pai machóng Phi-er tê.

Yê-su Câu Tâng Nương Kết-se-manê
 (Mathia 26:36-46; Luca 22:39-46)

32 Tữ alóí toâq ntốq nương Kết-se-manê, Yê-su atõng tốp rien tễ án neq: “Anhia õt tacu nâi nơ. Cứq pờq câu pờ ki.”

☆ 14:27 14:27 Sa-chari 13:7

33 Án dưng Phi-er, Yacõ, cốp Yang pỡq cốp án. Chơ Yê-su mbõiq sâng túh ngua lứq. 34 Án pai neq: “Cứq sâng ngua lứq, tỡ rơi tamoong noâng. Anhia õt acoan nâi. Anhia trỗ cốp cứq.”

35 Chơ Yê-su pỡq bĩq ễn. Án ap tâng cutễq muoi tatứp. Án câu sễq khân têq, yỗn ranáq nâi tỡ bữn toáq pỡ án. 36 Án câu neq: “Ơ Mpoaq cứq ơi!† Ntróu mới ễ táq, ki têq mới táq. Cứq sễq mới ayỏq cachoc túh coat nâi yỗn vớt tễ cứq. Ma cứq tỡ ễq puai rangứh cứq bữm. Cứq ễ puai ống rangứh mới sâng.”

37 Moâm ki Yê-su pích loah, cốp án ramóh alới bẻq. Chơ án blóh Phi-er neq: “Si-môn ơi! Mới bẻq tỡ? Nỏq mahõi la mới tỡ rơi trỗ cốp cứq? 38 Cỏq anhia tamỡ cốp câu chỗi yỗn noau radững anhia táq lôih. Mứt pahỡm anhia lứq bán rêng, ma sac sâiq anhia la ieuq.”

39 Ngkíq Yê-su pỡq câu sĩa. Án câu parnai machớng tễ nhũang. 40 Chơ án pích loah pỡ ntốq alới ốt sĩa. Án tamóh alới bẻq sĩa, yuaq moat alới ntâng lứq tỡ rơi culian. Alới tỡ dáng nỏq ễ ta-õi Yê-su.

41 Ngkíq Yê-su chu loah ntốq alới ốt trỗ pái. Cốp án blóh alới neq: “Nỏq noâng anhia bẻq cốp rlu níc? Anhia chỗi bẻq noâng. Khoiq toáq ngư chơ, noau chiau Con Yiang Cốt Cũai pỡ atí cũai lôih. 42 Yuor tayứng! Hái pỡq! Anhia nhêng! Án ca chẻq cứq khoiq toáq chơ.”

† 14:36 14:36 Tâng parnai Yê-su pai, án đốq Mpoaq án la ‘Aba’.

*Noau Cốp Yê-su**(Mathia 26:47-56; Luca 22:47-53; Yang 18:3-12)*

⁴³ Bo Yê-su noâng atông ngkiq, Yuda toâq toâp. Án la tẽ tốp muoi chít la bar náq rien tẽ Yê-su. Cốp bữn cứng cũai dững dau cốp cuan toâq cốp Yuda tẽ máh cũai sốt tốp tềng rit sang Yiang Sursĩ, tẽ cũai yống rit, cốp tẽ cũai sốt nheq sâu. ⁴⁴ Án ca ẽ chềq Yê-su khoiq atông tếc yõn cũai cứng ki dáng neq: “Khân aléq anhia hữm cứq hữn, cutõ án ki ơiq anhia ẽ bữn. Chơ anhia cốp án! Anhia yống yõn samoât, chơ dững án tẽ ntốq ki.”

⁴⁵ Chơ Yuda toâq toâp pỡ Yê-su cốp án pai neq: “Thâi ơi!”

Chơ án hữn Yê-su. ⁴⁶ Ngkiq noau toâq yống cốp cốp Yê-su.

⁴⁷ Manoaq tẽ alóit tayúng cheq ki thot dau tẽ sor, chơ tránh manoaq sũl cũai ca sốt nheq tẽ rit sang Yiang Sursĩ, p̄ieiq tâng cutữ, chơ ta-õh muoi coah cutữ. ⁴⁸ Ma Yê-su blóh cũai cứng ki neq: “Nốq anhia toâq pỡ nâi ma dững dau cốp cuan ẽ cốp cứq? Anhia chanchóm cứq la cũai savěng tỡ? ⁴⁹ Cu rangái cứq atông tâng Dống Sang Toâr, ma anhia tỡ bữn cốp cứq. Ma ranáq nâi yõn cõt rap̄ieiq máh tâm saráq Yiang Sursĩ khoiq atông tẽ mbốq.”

⁵⁰ Ngkiq nheq tữh alóit ca õt cốp Yê-su lúh táh nheq án.

⁵¹ Bữn manoaq samiàng póng puai Yê-su. Án satěng ống prê tâng tỗ án. Noau catoâng prê án,

ẽ cốp án. ⁵² Chơ án tũot táh chíq prê ki, cốp án lúh muoi rariat.

Yê-su Tayúng Yáng Moat Cũai Sốt
(*Mathia 26:57-68; Luca 22:54-55, 63-71; Yang 18:13-14, 19-24*)

⁵³ Tữ ki, alói dững Yê-su pở án ca sốt nheq tẽ rit sang Yiang Sursĩ. Nheq máh cũai sốt tốp tẽng rit sang Yiang Sursĩ, cũai sốt nheq sâu, cốp cũai yống rit toâq rôm pở ki tê. ⁵⁴ Phi-er puai cutuaih ntun Yê-su, chơ án mut tâng nchõh đống cũai sốt nheq tẽ rit sang Yiang Sursĩ. Án tacu nghẽng ùih parnoĩ cốp ranẽng cũai sốt ki.

⁵⁵ Máh cũai sốt tốp tẽng rit sang Yiang Sursĩ, cốp cũai bữn chóc canõh chuaq ralíh tẽ Yê-su, ẽ cachĩt án. Ma alói tở bữn ramóh muoi ọc ntróu. ⁵⁶ Bữn sa-ũĩ náq cũai toâq apót Yê-su ọc tở bữn lứq. Alói apót ma santoiq alói tở bữn ramóh parnoĩ. ⁵⁷ Bữn cũai yuor tayúng apót Yê-su neq: ⁵⁸ “Hẽq khoiq sâng án pai neq: ‘Cứq ẽ talõh đống sang Yiang Sursĩ ca atĩ cũai táq. Ma tâng pái tangái cứq táq loah tamái đống sang nâi, ma tở bữn tẽ atĩ cũai táq.’ ”

⁵⁹ Ma santoiq alói apót tở bữn ramóh parnoĩ.

⁶⁰ Chơ án ca sốt nheq tẽ rit sang Yiang Sursĩ yuor tayúng mpúng dĩ alói. Án blóh Yê-su neq: “Mói ẽ ta-õi ma tở bữn? Nỏq mới sâng tẽ máh ọc alói cauq mới?”

⁶¹ Ma Yê-su õt savưl sâng. Án tở bữn pai ntróu.

Án ca sốt nheq tẽ rit sang Yiang Sursĩ blóh loah Yê-su neq: “Mói la Crĩt, Con án ca hẽq sang toam, p̃ieiq tở?”

⁶² Yê-su ta-õi neq: “Lứq p̄ieiq! Chumat anhia lứq hữm Con Yiang Cốt Cũai tacu coah atoam Yiang Sursĩ Sốt Toâr Lứq, cốp án toâq mpúng dĩ ramúl tễ paloõng.”☆

⁶³ Chơ án ca sốt nheq tễ rit sang Yiang Sursĩ háq tampác án bữm, táq tếc án sâng ngua lứq. Cốp án pai neq: “Choam hái ễ blớh noâng cũai canõh? ⁶⁴ Anhia khoiq sâng chơ santoiq án pai la máh án acrieiq Yiang Sursĩ chơ. Nổq anhia chanchóm tễ ốc ki?”

Nheq tữh alóỉ pruam muoi mút, cốp anoat Yê-su cóq cuchĩt.

⁶⁵ Bữn cũai cuchóh tâng Yê-su. Alóỉ tán moat án, chơ alóỉ chooc án cốp blớh neq: “Noau chooc mới?”

Cốp máh cũai ranẽng tapáh án hỡ.

Phi-er Calõih Yê-su

(Mathia 26:69-75; Luca 22:56-62; Yang 18:15-18, 25-27)

⁶⁶ Bo ki Phi-er noâng ốt tâng nchõh. Bữn manoaq mansẽm táq ranáq yõn án ca sốt nheq tễ rit sang Yiang Sursĩ toâq pỡ ki. ⁶⁷ Tữ án hữm Phi-er ốt nghẽng ùih, án nhêng chu moat Phi-er cốp án pai chóq Phi-er neq: “Mới la cũai ca ốt cốp Yê-su tễ vil Na-sarết.”

⁶⁸ Ma Phi-er calõih Yê-su neq: “Tờ bữn! Cứq tỡ dáng ntróu mới pai! Cứq tỡ sapúh loâng!”

Chơ Phi-er loõh tễ ntốq ki. Ma bo ki toâp ntruoi tacar. ⁶⁹ Muoi trõ ễn mansẽm ki hữm Phi-er, cốp

☆ 14:62 14:62 Daniel 7:13

án atõng cũai ca õt tayúng ntõq ki neq: “Cũai nài la tẽ tốp ki tẽ.”

⁷⁰ Ma Phi-er calõih Yê-su sĩa.

Mahôi ên, máh cũai tayúng ki pai chõq Phi-er neq: “Lúq samoat mới la tẽ tốp alóí ki, yuaq mới la cũai Cali-lê.”

⁷¹ Phi-er thẽ dũan cloc plõ cloc sóc cõp alóí.

Án ta-õĩ suon níc neq: “Anhĩa pai cứq tẽ tốp án ki, ma cứq tỡ dáng nõq roáp án.”

⁷² Bo ki toáp ntruoi tacar bar trõ bar. Chơ Phi-er sanhữ loah santoiq Yê-su khoiq atõng án neq: “Nhũang ntruoi tacar bar trõ, mới calõih cứq pái trõ.”

Tữ Phi-er chanchóm loah santoiq ki, chơ án nhiam la-õq lúq.

15

Yê-su Tayúng Yáng Moat Phi-lat

(*Mathia 27:1-2, 11-14; Luca 23:1-5; Yang 18:28-38*)

¹ Toáq poang tarừp parnõ, mbõiq rừm-rừm, máh cũai sõt tốp tẽng rit sang Yiang Sursĩ, máh cũai sõt nheq sâu, cõp máh cũai yống rit rôm sarhõng parnõi cõp máh cũai sõt canõh. Moâm alóí sarhõng, alóí chõq Yê-su cõp dừng asuoi án toáq pỡ Phi-lat.* ² Phi-lat blóh Yê-su: “Mới la lúq puo I-sarel tỡ?”

Yê-su ta-õĩ: “Lúq pñeiq ariang mới pai.”

³ Máh cũai sõt tốp tẽng rit sang Yiang Sursĩ, alóí cauq Yê-su, pai án táq sa-ũĩ ranáq sâuq.

* **15:1** 15:1 Phi-lat la cũai Rô-ma, án táq sõt nheq cruang Yudê.

⁴ Chơ Phi-lat blóh loah Yê-su: “Nốq mới tở bữn ta-õi ntróu? Mới sâng chơ noau cauq mới sa-ữi ramứh.”

⁵ Ma Yê-su tở bữn ta-õi ntróu thág. Ngkíq Phi-lat sâng dót lứq.

*Noau Rườh Yê-su Chũuq Cuchĩt
(Mathia 28:15-20; Luca 23:13-25; Yang 18:39-19:16)*

⁶ Toáq tangái cũai I-sarel rôm cha bũi sanhữ Tangái Loỏh,† alóí bữn rit cũai sớt cruang ki acláh manoaq cũai tũ tể cuaq tam pahỏm cũai proai rườh yoc ể acláh. ⁷ Tangái ki tâng cuaq bữn manoaq ramứh Ba-raba. Án la tể tốp ể cheng sớt. Cóp án khioq cachĩt cũai hỡ. ⁸ Clứng cũai toáq pỡ Phi-lat, sểq Phi-lat táq rit riang cumo nhũang sĩa. ⁹ Phi-lat blóh alóí neq: “Anhia ểq cứq acláh puo I-sarel tở?”

¹⁰ Phi-lat dáng máh cũai sớt tốp tểng rit sang Yiang Sursĩ sâng ũan lứq chóq Yê-su, cỗ máh cũai proai alóí yoc ể puai Yê-su. Ngkíq alóí dừng Yê-su toáq pỡ án. ¹¹ Ma máh cũai sớt rit sang ớn cũai clứng ki sểq Phi-lat acláh Ba-raba, tở cõn Yê-su. ¹² Phi-lat blóh loah alóí neq: “Ntróu anhia ểq cứq táq chóq cũai nãi, ca anhia đốq puo I-sarel?”

¹³ Alóí ta-õi casang lứq neq: “Téh án tâng aluang sangcáng!”

¹⁴ Phi-lat blóh alóí sĩa neq: “Cỗ nốq? Ớc ntróu án táq sấuq?”

† **15:6** 15:6 Tangái ki alóí sanhữ tangái Yiang Sursĩ chuai yỏn alóí loỏh tể cruang Ê-yip-tô tể mbỏq.

Ma alóí ta-õi casang hõn tẽ nhũang ẽn: “Téh án tâng aluang sangcáng!”

¹⁵ Phi-lat ẽq pĩeiq pahõm máh cũai proai. Ngkíq án acláh Ba-raba yõn alóí, cớp án ớn noau proaih Yê-su. Vót ki án chiau Yê-su yõn alóí dững téh tâng aluang sangcáng.

Tahan Ayê Ra-ac Yê-su
(*Mathia 27:27-31; Yang 19:2-3*)

¹⁶ Chơ tahan dững asuoi Yê-su toâq pỡ nhõh dống noau dốq sữq cũai. Alóí arò parõm pachứm nheq tốp tahan ki. ¹⁷ Alóí asóp Yê-su au tuar santứm ẽng. Cớp alóí táq carvang sarlia apưng tâng plỡ án. ¹⁸ Chơ alóí táq nan cubán cusũan án neq: “Cucõh noau casai puo I-sarel.”

¹⁹ Alóí ayiat tâng plỡ án toâq dũi sa-ữi trở, cớp alóí cuchõh tâng tỡ án. Alóí sacõh racól táq nan sang án hỡ. ²⁰ Moâm alóí ayê ra-ac án ngkíq, alóí tũot táh chíq au tuar ẽng ki. Chơ alóí asóp loah tampác án bữm cớp dững aloõh án dốq téh tâng aluang sangcáng.

Noau Téh Yê-su Tâng Aluang Sangcáng
(*Mathia 27:32-44; Luca 23:26-43; Yang 19:17-27*)

²¹ Bo ki bữn manoaq ramứh Si-môn tẽ cruang Si-rên, mpoaq Alec-sandơ cớp Ruphu, pha na ki, án chu tẽ yáng tiah vil. Tahan ki ẽp yõn án dõl aluang sangcáng Yê-su.

²² Alóí dững Yê-su toâq pỡ ntốq noau dốq Cô-cô-tha. Santoiq nãi parlong loah la Ntốq Nghang Cantar Plỡ. ²³ Chơ alóí yõn Yê-su nguaiq blống

carchốc cớp cớng noau đốq múr. Ma án tở ẽq nguaiq. ²⁴ Alóí téh án tâng aluang sangcáng. Cớp alóí ít tampác án, chớ tampêq na séng anhúq, aléq bữn la chớ.

²⁵ Bo mandang cháh tarựp ki, alóí téh án tâng aluang sangcáng. ²⁶ Cớp alóí chĩc đốq pờng plữ Yê-su santoiq atống tễ án neq: NÂI LA PUO I-SAREL. ²⁷ Alóí téh bar náq cũai savẽng parnơi cớp Yê-su, manoaq coah atoam, manoaq coah avêr. ²⁸ Ranáq nâi cớt rapĩeiq tâng tâm saráq Yiang Sursĩ tễ mbốq khoiq pai neq:

“Án pruum ốt parnơi cớp cũai sâuq lứq.”‡

²⁹ Cũai ca pờq pha nốq noau cachĩt Yê-su, alóí culũt culiau ayê ra-ac án, pai neq: “Mới nâi oiq pai mới talốh đống sang Yiang Sursĩ, chớ mới táq loah moâm toáp tâng pái tangái. ³⁰ Âu mới sểng tễ aluang sangcáng ki, chuai amoong tở mới bữm!”

³¹ Cớp máh cũai sớt tốp tểng rit sang Yiang Sursĩ cớp nheq cũai yống rit ayê ra-ac Yê-su tề. Alóí pai neq: “Cũai canốh tềq án chuai amoong, ma tở án bữm tở hữm tềq án chuai. ³² Khân án lứq Crít, puo I-sarel, yốn án sểng tễ aluang sangcáng yốn hái hữm. Ngkíq hái lứq sa-âm án tề.”

Cớp bar náq ca noau téh tâng aluang sangcáng muoi próh cớp Yê-su, alóí ayê ra-ac Yê-su tề.

Yê-su Cuchĩt
(*Mathia 27:45-56; Luca 23:44-49; Yang 19:28-30*)

‡ 15:28 15:28 Sa-ữi tâm saráq tiaq tở bữn bữn rana 28 nâi.

33 Tễ moat mandang toâng toau toâq moat mandang priang cõt canám nheq chũop cruang ki. 34 Toâq mandang priang Yê-su arô casang lứq neq: “Ê-lô-i, Ê-lô-i, § lama-sabac-tani?”

Santoiq nâi parlong loah la: “Yiang Sursĩ cứq ơi! Yiang Sursĩ cứq ơi! Nỗq mới táh chíq cứq?”*[☆]

35 Bữn cũai tayúng cheq ki sâng án arô ngkiq. Chơ alói pai neq: “Ki! Án arô Ê-li.”

36 Cóp bữn manoaq tễ alói ki lúh ít muoi cõc aroâiq. Án alốq aroâiq ki tâng blống nhốq, cốp chốq tâng dũi. Chơ án avơi yõn Yê-su yáp. Án pai neq: “Hái coan voai. Hái nhêng Ê-li toâq alíh asẽng án, ma tỡ bữn.”

37 Ma Yê-su u-õi casang lứq, chơ ta-õh rangúh.

38 Bữn aroâiq noau yoang tâng Dõng Sang Toâr cõt raháq tễ pỡng toâq pũn, cõt bar sarẽc.

39 Bo ki bữn manoaq sớt muoi culám tahan õt tayúng yáng moat Yê-su. Tữ án hữm Yê-su ta-õh rangúh, án pai neq: “Lứq samoât cũai nâi la Con Yiang Sursĩ.”

40 Bữn máh cũai mansẽm õt yơng-yơng tapoang nhêng chu ki tê. Pái náq tễ tốp alói la Mari tễ vil Mac-dala, Salô-mê, cốp Mari mpiq Yô-sê cốp Yacõ Cót. 41 Tễ nhũang, bo Yê-su õt tâng cruang Cali-lê, alói pái náq mansẽm nâi đốq puai Yê-su cốp chũm siem án. Cốp õt ngki, bữn máh mansẽm ca pỡq parnơi cốp Yê-su bo án chõn chu vil Yaru-salem.

§ 15:34 15:34 Tâng parnai Hê-bơ, parnai nâi la ‘Ê-li’. ☆ 15:34 15:34 Ủat Khển 22:1

Noau Túp Yê-su
(*Mathia 27:57-61; Luca 23:50-56; Yang 19:38-42*)

⁴² Tangái ki la tangái noau thrũan nhũang Tangái Rlu. Toâq paloõng tabũ cheq ntruoi mut looc, ⁴³ Yô-sep tẽ vil Ari-mathê toâq pỡ Phi-lat. Án la manoaq tẽ tốp cũai sớt ca noau yám lứq, cốp án nguang Yiang Sursĩ táq sớt. Án tỡ bữn ngcõh sểq tẽ Phi-lat cumuiq Yê-su. ⁴⁴ Phi-lat sâng dót lứq noau pai Yê-su khoiq cuchĩt chơ. Ngkíq án arô cũai sớt muoi culám tahan yoc ẽ blóh án Yê-su cuchĩt, ma tỡ yũah. ⁴⁵ Toâq Phi-lat dáng tẽ tahan ki pai Yê-su khoiq cuchĩt chơ, án yõn cumuiq Yê-su pỡ Yô-sep. ⁴⁶ Ngkíq Yô-sep ít muoi ploah aroaiq busín. Moâm án alíh Yê-su asẽng tẽ aluang sangcáng, án som toâq aroaiq ki, cốp án dỏq cumuiq Yê-su tâng ping noau tồc tamáu cõl. Chơ án vih tamáu catáng chíq ngoah ping. ⁴⁷ Mari tẽ vil Mac-dala cốp Mari mpiq Yô-sê, alóí hữm ntốq noau dỏq cumuiq Yê-su.

16

Yê-su Tamoong Loah
(*Mathia 28:1-8; Luca 24:1-12; Yang 20:1-10*)

¹ Vớt Tangái Rlu, chơ Mari tẽ vil Mac-dala, Mari mpiq Yacõ, cốp Salô-mê, alóí pái náq dững crơng phuom ẽ tia tâng cumuiq Yê-su. ² Tangái muoi tâng tồc ki, poang tarựp moat mandang mbõiq loõh, alóí toâq pỡ ping. ³ Alóí manoaq blóh manoaq neq: “Noau têq vih tamáu tẽ ngoah ping yõn hái?”

⁴ Tamáu ki toâr lứq. Ma từ alói tapoang achôn, alói hữm khoiq noau vih tamáu ki chơ. ⁵ Từ alói mut tâng ping, alói hữm manoaq samiang póng sớp au tuar cloc, tacu coah atoam tâng ntốq ki. Chơ alói sâng croõq. ⁶ Ma samiang ki atõng alói neq: “Chõ croõq ntróu. Cứq dáng anhia chuaq Yê-su tễ vil Na-sarê, án ca noau khoiq téh tâng aluang sangcáng. Ma án tở bữn ớt nnâi noâng. Án khoiq tamoong loah chơ. Anhia nhêng chu ntốq noau đõq cumuiq án. ⁷ Chơ anhia pớq atõng tốp rien tễ Yê-su, cớp Phi-er neq: ‘Yê-su pớq nhũang anhia pớ cruang Cali-lê. Anhia pớq pớ ki, anhia lứq ramóh án ariang án khoiq atõng anhia tễ nhũang chơ.’ ”

⁸ Ngkíq mansêm ki lúh loõh vót tễ ping. Alói sâng dót lứq, cớp alói cangcoaih yuaq alói sâng croõq lứq. Alói tở khón táq ntõng yõn cũai canõh dáng, miaq alói croõq.

*Mari Tễ Vil Mac-dala Ramóh Loah Yê-su
(Mathia 28:9-10; Yang 20:11-18)*

⁹ Tangái muoi tâng tổn ki, Yê-su yuor tamoong loah tễ ping. Tarừp ki noâng cláih lứq án pớq sapáh yõn Mari tễ vil Mac-dala hữm. Mari la cũai ca Yê-su khoiq tuih aloõh tapul lám yiang sâuq.* ¹⁰ Chơ Mari pớq atõng máh yóu Yê-su dáng tễ ranáq án khoiq hữm. Ma yóu Yê-su ớt nhiam tanúh níc. ¹¹ Từ yóu Yê-su sâng Mari pai Yê-su lứq tamoong loah, cớp án khoiq hữm Yê-su chơ, alói tở bữn noap parnai án.

* **16:9** 16:9 Choàiq tiaq tở bữn bữn rana 9 toâq rana 20.

*Yê-su Ramóh Bar Náq Tânq Rana
(Luca 24:13-35)*

¹² Moâm ki bữn bar náq cũai canõh ẽn loõh tẽ vil Yaru-salem. Yê-su toâq sapáh tỗ án cõt roáp mpha ẽn yõn bar náq ki hữm. ¹³ Bar náq ki chu atõng yóu Yê-su dáng pai alóí lứq hữm Yê-su, ma yóu Yê-su tỡ bữn noap sĩa.

*Yê-su Toâq Pỡ Tỗp Rien Tẽ Án
(Mathia 28:16-20; Luca 24:36-49; Yang 20:19-23; Ranáq Táq 1:6-8)*

¹⁴ Ntun ẽn Yê-su sapáh tỗ án yõn tỗp muoi chít la muoi noaq hữm án tê. Yê-su táq ngkíq bo tỗp muoi chít la muoi noaq tacu chi-cha. Cóp Yê-su tẻq alóí, yuaq alóí bữn mút coang cóp tỡ bữn noap án lứq tamoong loah, samoât noau khoiq atõng alóí. ¹⁵ Yê-su atõng alóí neq: “Anhia pỡq chũop dũ cruang pũn paloõng cutrúq nâi cóp atõng yõn nheq tũh cũai dáng parnai o tẽ cứq. ¹⁶ Cũai aléq ma sa-âm cứq cóp roap batẽm, cứq lứq chuai amoong cũai ki. Ma cũai aléq tỡ bữn sa-âm cứq, cũai ki cóq chũuq tột án bữm. ¹⁷⁻¹⁸ Alóí ca lứq sa-âm cứq, ki alóí tẻq táq ranáq salẽh neq: Nho ramứh cứq alóí tẻq tuih aloõh yiang sâuq, tẻq atõng parnai tamái, tẻq yõng cusân ma tỡ bữn pân ntróu, tẻq nguaiq cớng bũl ma alóí tỡ bữn bũl, cóp tẻq satoaq atĩ tâng cũai a-ĩ yõn cũai ki cõt bán.”

*Yê-su Chõn Loah Chu Paloõng
(Luca 24:50-53; Ranáq Táq 1:9-11)*

19 Moâm Yê-su pai ngkíq, chơ án chõn loah chu paloõng, cóp án tacu coah atoam Yiang Sursĩ.

20 Chơ tốp rien tẽ Yê-su loõh pỡq chu nâi pỡq chu ki atõng parnai o tẽ Yê-su. Cóp Yiang Sursĩ chuai alói, yõn alói bữn chóc têq táq ranáq salẽh. Yuaq ngkíq cũai têq dáng samoât lứq parnai alói atõng la lứq p̃ieiq.

lxxxi

**Parnai Yiang Sursĩ - Kinh Thánh tiếng Bru
Bru, Eastern: Parnai Yiang Sursĩ - Kinh Thánh tiếng
Bru Bible**

copyright © 2015 Wycliffe Bible Translators, Inc.

Language: Eastern Bru

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022

2f74bcbe-d4f1-5386-8c30-29d0147bb706